

## To tekepo Makaye hogugu Maka

*Maka booka goo eyo bei*

*Odoo howo sauwidili, Yoneeye to tekepo taka  
goo*

*(Matiyu 3:1-12, Luka 3:1-18, Yonee 1:19-28)*

<sup>1</sup> To tekepo bei mimooloogoo hagoso, Godeeyo owolo Yesu Kelisowo goo. <sup>2</sup> Daga hoogoo Godeeyo to tosili odoo Aisaya yayo booka mapoo Godeeye Yesu mapoo to taka egeesee hoguguso:

“Ayo mo to tosili odoo malalo diye dalaiso.

Osoloso yayo dilesos nee eli moodoolame.

<sup>3</sup> Miwe poogoo mi omaga edebeeyo egeesee idagoo,

‘Lodee yayo sibilei eli moodee.

Osoloso medee hoodo magee.’ ”

<sup>4</sup> Yonee odoo howo sauwidili miwe poogoo mi mapoo peledoboloso, yayo odoo howo sauwudulone to tekepo takolone egeesee takaso, “Niba goo su wuduloso nibada goo tokenee maga waki pialoso howo sauwige, egeeseega Godeeye nibada goo tokenee hapoloso boobado pigileiso.”

<sup>5</sup> Yudiya mi mapoo debeli mosobia sabolo, osoloso Yoluselem mi toowa mapoo debeli odoo susuga Yoneeye to taka dulame diadeeso, osoloso dibada tokenee Yonee mapoo yiligime, Yoneeye diba Yoden howo mapoo sauwidiso. <sup>6</sup> Yonee yo kemol be hu too dugo masi dusa kaloso silone gala kolo gudu masi kalo sili. Osoloso nei yayo

nali tapala toowa sabolo koo sabolo nali. <sup>7</sup> Yayo odoo susuga mapoo egeesee takeliso, “Odo hee ama hamamee sibileiso. Yayo kitulugu toowa ayo kitulugu yayo dagadi. A tekeponee o homo bei mapoo gawuloso o homo bi tikamakalai. <sup>8</sup> Ayo niba howodeeso sauwidiso, esino niba hamamee yayo Dio Tei maga howo sauwidileiso.”

*Yesu howo sauwe sabolo kuku sabolo  
(Matiyu 3:13—4:11, Luka 3:21-22; 4:1-13)*

<sup>9</sup> Haga bologolega Yesu Gelili mi toowa ma kulodu mi pepoko Naselet omaga sibume, Yoneeye yo Yoden howomoo howo sauwidiso. <sup>10</sup> Yesu howomooga gasibileso egeino, kei mi yamagoloso Dio Tei molo masi yimapoo pubalogome egeiso. <sup>11</sup> Osoloso keimi ma dokodooga to egeesee taka, “No ayo gooma mo holo noso, a namapoo dia goomogo.” <sup>12</sup> Osoloso beeame omapoo Dio Teiso Yesu miwe poogoo mi omapoo diye diso. <sup>13</sup> Yesu beeame 40 omapoo gala seebee sabolo bado-boome, saitenso kuku demeleso. Esino Godeeyo momaiye sibilesi yo pidiso.

*Yesuye di kebili odoo bakadio bakadiodi gilimadoo goo*

*(Matiyu 4:12-22, Luka 4:14-15; 5:1-11)*

<sup>14</sup> Yu odoo wiligi toba Helodeeye, Yonee neliga ma kulodu husuloso, hamamee Yesu yo Gelili mi toowa mapoo dilesi, to medee tekepo Godee maga simi takomo siliso. <sup>15</sup> Yayo egeesee takaso, “Beeame tekepo olo simiso, osoloso Godeeye wiligi doloso badeli oso sibilei koola toopooso. Esiga niba goo tokenee maga waki pialoso, to tekepo mapoo tei te.”

<sup>16</sup> Beeame heeso, Yesu Gelili abei palaga dimeleeno, di kebikeli odoos bakadio Saimon dio omolo Endulu dio peiso di giligamolome yayo egeiso. <sup>17</sup> Esemé Yesuye dimapoo egeesee takaso, “Niba ama hamamee sibadee, ayo niba odoos gilimeli eligileiya.” <sup>18</sup> Esemé diba Yesuwo to duloso, dibada pei pogoloso, yima hamamee diadeeso.

<sup>19</sup> Osoloso yo pepoko hoogoo dileso, di kebikeli odoos abo Sebediyo owolo bakadio, Yemes dio omolo Yonee dio du ma kulodu dopolone pei moodoomolome egeiso. <sup>20</sup> Osoloso Yesu diba ogoloso, yayo diba gilimadooso. Esemé diayo dulone o tou telagali odoos sabolo oma Sebedi sabolo du ma kulodu gilimane pogoloso, Yesu ma hamamee diadeeso.

*Odoos bo holo pala*  
(Luka 4:31-37)

<sup>21</sup> Yesu o hamamee dili odoos sabolo Kapeniyum mi mapoo simiso. Osoloso Yu odoowo tei beeame hee mapoo, Yesu howo gisili moso omapoo peleso, Godeeyo to eligilame mimooloogooso. <sup>22</sup> Odoos susuga yayo eligi dume howoogaso, bei yayo kitulugu sabolo eligime. Esemé odoos susuga diso nei woosa nei woosa demeleso egeesee takaso, “Odoos hagee ogumo? Ibada tei goos eligili odoos oso eligi goos egesinee. Bei diayo eligi mapoo kitulugu mauwe.” <sup>23</sup> Epedee omapoo, odoos bo holo pala oso howo gisili moso kulodu gadileso agadiso. <sup>24</sup> “Yesu Naselet odoos nayo amapoo osoloso bo holo abo mapoo ogoo goos moodoolameyo? No hamapoo iba tokenee

palame ka simiyo? A gooleedooso, no Godeeyo tei odoo.”

<sup>25</sup> Yesuye bo holo odoo mapoo to kitulugu sabolo egeesee takaso, “To koodobie, no odoo ma kuloduga peegoo gadi!” <sup>26</sup> Esem bo holo oso odoo ma kulodu badolone neligidi kikiligameleso gwa sabolo peegoo gadiso.

<sup>27</sup> Esem, odoo susuga dia howoogaso, osoloso disono nei woosa nei woosa diso, “Goo hagee ogoo goowo? Goo hagee dia eligi kitulugu sabolo eligi, bei edebeeyo bo holo mapoo to takooga, peegoo koo gadili. Esino Yesuye bo holo mapoo to takooga, mesiloso peegoo gadiliso.” <sup>28</sup> Esem Gelili mi toowa mapoo odoo susuga goo ee saga takomo diso.

*Yesuye odoo paigiga tekepo moodoo  
(Matiyu 8:14-17, Luka 4:38-41)*

<sup>29</sup> Howo gisili moso poogoo dileso, Yesu Yonee sabolo Yemes sabolo, Saimon dio Endulu dio dibada moso mapoo diso. <sup>30</sup> Saimonwo nalobo paiye kolo dei moodoome debi mapoo tiameleeso. Diayo Yesu mapoo sobo paiye eyo goo takaso. <sup>31</sup> Osoloso Yesu sobo paiye mapoo dileso, o dee mapoo toloso, “Teebee,” diso. Esem paiye kolo dei saga yimaga koodo diso. Esem yayo dimapoo nei teneeso.

<sup>32</sup> Habe osoko tolopume odoo abo oso Yesu mapoo odoo paigiga sabolo bo holo paladee odoo sabolo ido sibadeeso. <sup>33</sup> Osoloso Kapeniyum mi toowa mapoo debeli odoo susuga Yesuye odoo paigiga moodoo ee agalame osulu miyopoo mooloogoodooso. <sup>34</sup> Esem Yesuye odoo paigiga

mudu opusomo opusomodi yayo takeme tekepo poloso weido diso. Osoloso bo holo odoo ma kulodu debei peegoo hasisilone dimapoo egeesee takaso, “Mo goo na takee,” diso, bei bo holo susuga diba Yesu Godeeyo owolo deli gooleedooso.

*Yesuye Gelili mi toowa mapoo to takomo di goo  
(Luka 4:42-44)*

<sup>35</sup> Gesikolodee mi hadopeelega, Yesu hogabuloso moso poogoo dileso, obusomo odoo koola mauwe mapoo dokodoo toodagalame diso. <sup>36</sup> Hamamee Saimonbolo debei odoo abo sabolo Yesu esiamo diso. <sup>37</sup> Diayo yo egeme yimapoo takaso, “Odoosuga no esia moloso.”

<sup>38</sup> Yesuye to nei takaso, “Iba mi abo mapoo dimo, omapoo dileso Godeeyo to takalame. Bei kasee magayo a goo egee talame simi.” <sup>39</sup> Osoloso yo Gelili mi toowa ma kulodu mi pepoko susuga mapoo dileso, Yu odoowo howo gisili moso eyo kulodu Godeeyo to takomo sileeso. Osoloso bo holo odoo ma kulodu pala peegoo hasisopugu demeleso.

*Yesuye odoo kolo e bia masi moodoo  
(Matiyu 8:1-4, Luka 5:12-16)*

<sup>40</sup> Odoosuga kolo e bia masi Yesu mapoo sibilesos ebiso miyomoo tugusaloso egeesee takaso, “Nayo a tekepo moodolai goomogoga, a tekepo moodee.”

<sup>41</sup> Yesuye yo dia sooloo dolome o kolo mapoo sigolone yimapoo egeesee takaso, “Ayo no tekepo palai goomogo, esiga no tekepo pe.” <sup>42</sup> Esemee epedee omapoo o kolo mapoo e bia masi mauwe

poogooso. <sup>43</sup> Yesuye yo di dolone to kitulugu sabolo egeesee takaso, <sup>44</sup> “Nayo dilesa no ayo tekepo pa goo ee odo o abo mapoo na takee. Esino, nee su tekepo pa goo ee, goo tokenee hapalame gala hu weli wiligi odo toba yimapoo dilesa eligi. Osoloso nee su tekepo pa amaga emegeidi bi tenee, Moseseeye tei magoo goo ee dodolone, odo susuga oso ogoloso tekepo pa ee gooleedalame.”

<sup>45</sup> Esino yo Yesuwo to mapoo tei telega pogoloso, odo susuga mapoo o kolo e bia masi moodoo oposususo. Bei egeesee maga Yesuye mi kamapoo disomo, odo susuga oso Yesu agalame dia mooloogoodoo diso. Esem Yesu mi abo mapoo odo howo woola sile. Esino yo mi odo mauwe mapoo bado neme edebeeyo mi opusomo opusomodi maga yayo badebei mi mapoo yo agalame sibadee demeleeso.

## 2

### *Odo su kakawa poogoo moodoo (Matiyu 9:1-8, Luka 5:17-26)*

<sup>1</sup> Beeame abo pogoloso hamamee, Yesu see Kapeniyum mi mapoo wedi sibume, edebeeyo Yesuye simi ogoloso, mi omapoo saga takomo diso. <sup>2</sup> Osoloso odo susuga sibilesa, o moso kulodu sabolo peegoo sabolo omapoo dia mooloogoodoome, Yesuye dimapoo Godeeyo to eligi meleeso. <sup>3</sup> Esem mi omapoo odo su kakawa poogoo badebei, odo bakadio bakadiodi oso

kida mapoo magoloso tosimiso. <sup>4</sup> Osoloso di-ayo yo Yesuye badebei omapoo todilame goomogaso. Esino odoos beiga Yesu mapoo dilei eli egele. Esem diayo odoos su kakawa poogoo kida sabolo moso omu dokodoo imado palaso. Osoloso Yesuye to kemelee domo amaga seme ou toloko pogoloso tiso kida mapoo bagagoloso kida sabolo moso kulodu toosoos. <sup>5</sup> Diayo odoos su kakawa poogoo moso omu maga toosoos egame, Yesuye diayo odoos egee yayo moodoolame, yo tebia doloso tei too ogoloso, odoos su kakawa poogoo mapoo takaso, “Mo odoos, nee tokenee ayo boobado puguso.”

<sup>6</sup> Tei eligili odoos disono dopolone diso nediliyo egeesee goolee meleeso, <sup>7</sup> “Odoos hagoso kaseme egeesee ka takayo? Yayo Godee daga dilame see, esino goos tokenee hapeeli hedepe Godeeso.”

<sup>8</sup> Yesu o dio oso diayo dibada sooloo ma kulodu goolee melee goos ee gooleedoloso dimapoo egeesee takaso, “Niyo kasee maga nibada sooloo ma kulodu egeesee ka goolee malala? <sup>9</sup> Ayo odoos su kakawa poogoo mapoo ‘Nee tokenee ayo boobado puguso,’ dee takooga, o tokenee boobado pugu niyo gooleedalame. Esino ayo yimapoo takoo ‘No toposo nee kida tolosos di,’ dee takolosos, yo tobooga, a odoos moodeli kitulugu molo doloso niyo gooleedalaisos. <sup>10</sup> Esino niyo gooleedalame, Odoos Holo amapoo kitulugu olo teneeso mi toowa hamapoo tokenee goos hapolosos boobado pigilame,” yayo odoos su kakawa poogoo yimapoo egeesee takaso, <sup>11</sup> “No hogabulosos nee kida tolosos mosopoo di,” diso.

<sup>12</sup> Diayo balagamolome odoo su kakawa poogoo hogabuloso, o kida toloso saga diso. Diayo odoo su kakawa poogoo oso topoloso di egeme dia howoogaso. Osoloso Godee mapoo goomoga pouduso. Osoloso diayo egeese takaso, “Iba daga goo hageese koo egeli.”

*Yesuye Libai idoo goo  
(Matiyu 9:9-13, Luka 5:27-32)*

<sup>13</sup> Yesu Gelili abei palaga maga see wedi dimeleeno odoo susuga sibilesos yimapoo mooloogoodome, yayo Godeeyo to dimapoo eligi meleeso. <sup>14</sup> Yesu abei palaga dulone egeino odoo Alpies eyo owolo Libai tekisi molee misikeli moso kulodu badoboome egeiso. Esemeyo yimapoo takaso, “Ama hamamee sibe.” Esemeyo Libai topoloso Yesuye di hamamee diso.

<sup>15</sup> Habe Yesu Libaiyo mosopoo badebeeno, tekisi molee misikeli odoo bei sabolo, goo tokenee teli odoo abo sabolo, osoloso Yesuwo hamamee dili odoo sabolo, Yesubolo nei nameleeso. Odoo bei hageese oso yimapoo hamamee dili odoo.

<sup>16</sup> Osoloso Yesu tekisi molee misikeli odoo sabolo, osoloso goo tokenee teli odoo sabolo nei namolome, tei eligili Pelisi odoo oso ogoloso, o hamamee dili odoo mapoo egeese woosaso, “Yesu bei kasimaga tekisi molee misikeli odoo sabolo goo tokenee teli odoo sabolo nei ka namolosomo?”

<sup>17</sup> Yesu diayo to taka duloso to nei dimapoo takaso, “Odoopaiye mauwe melesene neli odoo mapoo dileime, esino odoo paiye melesene neli odoo mapoo dileiso. Ayo simi hagee tekepo teli doloso wulo googolee oso gweli odoo ee



gilimilame ka sibile, tokenee teli dee gweli odo  
gilimadoloso Godee mapoo sibilame ka simi.”

*Wo nelega tei doloso badalai goo  
(Matiyu 9:14-17, Luka 5:33-39)*

<sup>18</sup> Beeame aboso Yonee odo howo sauwidili o hamamee dili odo sabolo Pelisi odo sabolo wo nelega tei doloso Godee mapoo toodagalame de-beiso. Beeame hedepeso odo aboso Yesu mapoo sibilesa woosaso, “Yonee o hamamee dili odo sabolo, Pelisi odoowo hamamee dili odo sabolo, wo nelega tei doloso dopolone, bei kasimaga nee hamamee dili odo wo nali tei delega ka debeliyo?”

<sup>19</sup> Yesuye to nei takaso, “Gisoso sobo hulei beeamo omapoo odo abo sabolo wo nelega tei doloso dabalaisomo? Haya, yo dibolo badebei omapoo, wo nelega tei doloso badalaime.

<sup>20</sup> Beeame hedepeso giso sobo daga hu, toloso peegoo dilei beeamo siboga, diba beeamo omapoo wo nelega tei doloso dabalaiso,” diso.

<sup>21</sup> (Yesuye Yu odo oso dibada odooga dia tei mapoo dodolone kituluguloso debei egeiso. Esem yayo diba o goo dia eligi ee dadalai tebile gooleedooso.) Esiga Yesuye dimapoo dio masi taka bakadio hagosu. “Odo agayo dugo nape didediba omapoo dugo dia diadoloso dugo nape didediba mapoo opodoloso dusaga dugo diasu kitulugu oso dugo nape hapoomelee hapoomologa didedibilone ou toowa tologo pigileiso. <sup>22</sup> Edebeeyo howo giedege ou sia mapoo keesoga, ou gadia maga howo solaiso. Esiaga edebeeyo howo giedege ou dia mapoo keeselai tekepo,” diso. (Yesuye dio masi bakadio

taka eyo bei hagoso: Ayo mo goo dia eligi ee nibada odooga dia tei sabolo hedepe dalame ka sibile. Esino ayo simi hagee goo dia ayo tosimi omapoo niyo dadalame ka simi.)

*Yu odoowo tei beeamo goo  
(Matiyu 12:1-8, Luka 6:1-5)*

<sup>23</sup> Yu odoowo tei beeamo heeso, Yesu o hamamee dili odoo sabolo kakomee howo masi segei eli pee maga diso. Yesu o hamamee dili odoo oso kakomee masi gooloogaloso du-lone nalagamo diso. <sup>24</sup> Esem Pelisi odoo diayo ogoloso Yesu mapoo woosaso, “No ege, bei kasee maga nee hamamee dili odoo oso Yu odoowo tei beeamo eyo tei magoo ka gabauwala? Diayo kakomee masi goolooga maga ibada tei magoo ee gababuo.”

<sup>25</sup> Yesuye nei takaso, “Niba wiligi odoo toba De-bidibolo odoo yibolo debei sabolo oso houdoome, Debidiye goo moodoo ee hogugu niyo hesigileyo? <sup>26</sup> Abayata yayo Godeeyo tei moso tegei wiligi toboloso badebei omapoo, Debidiye Godeeyo tei moso tegei mapoo gapeleso tei wo Godee mapoo tenee neso. Osoloso Debidiye wo naloso o odoo abo mapoo teneeso. Esino wo egee odoo abo koo nali, tokenee goo hapalame gala hu weli wiligi odoo tebisa oso nali. <sup>27</sup> Godeeye edebeeyo tei beeamo ee pidilame ka moodoole. Godeeye odoo pidilame tei beeamo ka moodoo. Egeeseega niyo Debidiye o odoo sabolo houdoome, tei magoo gababulone tei wo ne takele. Esiga bei kasi maga niyo mo hamamee dili odoo oso houdoome goo moodoo ka takala? <sup>28</sup> Esiga Odoo Holo Yesu, a

wiligi odoo tobaso, osoloso tei beame mapoo ayo wiligi doloso ka badoso.”

### 3

*Yesuye odoo dee hodio kakawa poogoo moodoo (Matiyu 12:9-14, Luka 6:6-11)*

<sup>1</sup> Yesu see Yu odoowo howo gisili moso omapoo kulodu gapeleso egeino, odoo dee hodio kakawa poogoo badoboome egeiso. <sup>2</sup> Pelisi odoo Yesu mapoo hegi sibilesi balagamo siliso, yayo Yu odoowo tei beame omapoo odoo dee hodio kakawa poogoo tekepo modapeleso agalame. Yesuye odoo dee hodio kakawa poogoo tekepo moodooga, diayo ogoloso Yesu mapoo takalame. <sup>3</sup> Esemé Yesuye odoo dee hodio kakawa poogoo mapoo takaso, “No bia amaga teebee, odoo susuga oso agalame.”

<sup>4</sup> Esemé Yesuye Pelisi odoo mapoo woosaso, “Iyo tei beame omapoo ogoogo talai oso tei ka molosomo? Iyo tekepo gootalaiyo o iyo tokenee gootalaiyo, o giebadili pidileiyo, o giebadili wolomalaiyo?” Esino Pelisi odoo Yesu mapoo to nei takele.

<sup>5</sup> Yesu dibada sooloo ma kulodu sooloo dala goomauwe pogoloso kalawoloso debeli ogoloso sooloo deleme kamana sabolo dimapoo egeino, odoo dee hodio kakawa poogoo ogoloso yimapoo takaso, “Nee dee hoode.” Esemé o dee hoodeme o dee tekepo paso. <sup>6</sup> Esemé Pelisi odoo, Yu odoowo howo gisili moso maga peegoo dileso, Helodeeyo mooloogoodoo odoo ogoloso, diayo Yesu wolomalame to mouso.

### *Odoo susuga Yesuye di hamamee di*

<sup>7-8</sup> Yesu o hamamee dili odoo sabolo Gelili abei mapoo dime, odoo mooloogoodoo toowa Yesuye di hamamee diadeeso. Odoo susuga Yesuye goo moodoo dume yimapoo sibadeeso. Odoo susuga hagee mi opusomo opusomodi mi hamaga sibadee: Gelili mi toowa, Yudiya mi toowa, Yoluselem mosobia, Idumia mi toowa, Yoden howo hodio hoogoo debeli Taya mi toowa sabolo Saidon mi toowa amaga sibadeeso. <sup>9-10</sup> Esemé Yesuye odoo paigiga abo tekepo moodoome weido diso, osoloso odoo paigiga abo oso yimapoo sigilame hegi pupugamo sibume, yayo o hamamee dili odoo mapoo takaso, “Niba du hee tosibe, bei abei palaga omapoo odoo dia mooloogoo deeyaga,” diso. <sup>11</sup> Odoo bo holo pala oso Yesu ogoga diba o homo beiyopoo gawuloso goolone egeesee takeliso, “No Godeeyo owoloso,” diso. <sup>12</sup> Esemé Yesuye odoo bo holo pala omapoo to kitulugu sabolo takeliso, “Nayo odoo abo mapoo a Godeeyo owolo dee na takee,” doloso takeliso.

### *Yesuye odoo 12 gilimadoo goo (Matiyu 10:1-4, Luka 6:12-16)*

<sup>13</sup> Yesu mubi ma dokodoo peleso yayo goomoga odoo hesigaloso yayo gilimademe diba yimapoo sibadeeso. <sup>14</sup> Yesuye 12 odoo hesigaloso dimapoo takaso, “Niba abolo sile sibileiso, osoloso niba diye dalaiso Godeeyo to takomo sile sibilame. <sup>15</sup> Osoloso, ayo nimapoo kitulugu tenelaiso odoo bo holo pala peegoo hasisilame.” <sup>16</sup> Yesuye gilimadoo odoo 12 dia hu hagoso: Saimon (Yesuye hu hee hedi, Pita); <sup>17</sup> osoloso Sebediyo owolo

bakadio Yemes dio omolo Yonee dio (Yesuye hu hee hedi Bouwaneges. Hu eyo bei to kei wei masi weli); <sup>18</sup> osoloso Endulu, Pilipi, Batolome, Metiu, Tomas, Alpiesyo owolo Yemes, Tadies, Saimon Selot (Saimon Selot: selot hu eyo bei Loum Gamali gowili odoo), <sup>19</sup> osoloso Yudas-Iskaliyot (Yesu ha teli odoo mapoo tiasili).

*Yesu dio Bulsibapo dio*

*(Matiyu 12:22-32, Luka 11:14-23; 12:10)*

<sup>20</sup> Esemé Yesu o odoowo moso mapoo wedi dileso badoboome, odoo susuga see dia mooloo-goodooso. Esemé Yesu sabolo o hamamee dili odoo sabolo diayo nei nalai beame egele.

<sup>21</sup> Esemé o soosooso goo egee duloso, yo halapomo sila pele dolone, yo dibada mosopoo ido dilame sibadeeso.

<sup>22</sup> Esino tei eligili odoo Yoluselem maga sibadee oso egeese takaso, “Yesu yo bo wiligi toba Bulsibapo (Saiten o hu hee) o kulodu badoso. Esiga yo bo wiligi toba eyo kitulugu maga bo holo peegoo hasisilone ka badoso.”

<sup>23</sup> Esemé Yesuye tei eligili odoo gilimadoloso dio masi takaso, “Saiten odoo ma kulodu badebei diso nediliyo peegoo kasee hasisileiyo? Eli mauwe. <sup>24</sup> Mi toowa mapoo debeli odoo domo puloso diso nediliyo ha toga mi toowa egee malaimé tokenee palaiso. <sup>25</sup> Osoloso soosoo heeso domo puloso diso nediliyo ha toga soosoo egee debelaime tokenee palaiso. <sup>26</sup> Osoloso Saiten eyo nediliyo o odoo sabolo ha toga, yayo kitulugu sagelaime, omapoo mauwe pagalaiso.” <sup>27</sup> Yesuye dio masi hee takaso, “Esiga odoo heeso, kitulugu

odoo eyo mosopoo bi heli talame gooleega, yo daga kitulugu odoo tiso tiamagoloso, hamamee o moso kulodu peleso, bi heli talaiso. <sup>28</sup> Esiga ayo nimapoo tei goo hee taka, tokenee goo susuga edebeeyo teli sabolo, osoloso to tokenee Godee mapoo takeli ee Godeeye hapoloso boobado pig-ileiso. <sup>29</sup> Esino odoo agayo Dio Teiyo goo mapoo to tokenee takooga, yo o goo tokenee hapalaimo, o goo tokenee moloso kookaiyo osee malaiso.”

<sup>30</sup> Yayo goo hagee dimapoo takaso, bei diayo yo bo holo paladee dee takeme.

*Yesuwo owee sabolo omolo dio sabolo  
(Matiyu 12:46-50, Luka 8:19-21)*

<sup>31</sup> Yesuwo owee sabolo omolo dio Yesuye eligimelee moso mapoo peledabaso. Diba Yesubolo to kalame hau mapoo tebisa molome, odoo heeso Yesu takalame moso kulodu gadiso.

<sup>32</sup> Esemme odoo susuga Yesubolo debei odoo diayo ogoloso Yesu mapoo egeesee takaso, “Noowee sabolo no molo dio oso peegoo no esia molo.”

<sup>33</sup> Yesuye dimapoo eligilame to nei woosaso, “Mo wee sabolo molo dio odoo ogumo?”

<sup>34</sup> Esemme Yesuye odoo buluma omapoo ogogolone egeesee takaso, “Hamapoo ege, hagee mo wee sabolo molo dioso. <sup>35</sup> Odoo agayo Godeeye goomoga goo tomo siloga, diba tei molo dio osoloso mo wee dioso.”

## 4

*Ko segili odoo eyo dio masi oposusu  
(Matiyu 13:1-9, Luka 8:4-8)*

<sup>1</sup> Yesuye Gelili abei palaga odoo susuga mapoo see tobu eligimeleeso. Esino odoo susuga yimapoo mooloogoodeme, yo du ma kulodu meledoboloso buloso pepoko hoogoo dilesa amaga to takaso. <sup>2</sup> Yesuye dio masi susuga dimapoo eligiliso. Yayo eligilone dimapoo takaso, <sup>3</sup> “Niba dui! Odoo hee ko sakalame diso. <sup>4</sup> Yo omapoo ko kukopugumo silino, ko abo eli domopoo misikedibaso, eseme só aboso sibilesa neso. <sup>5</sup> Osoloso ko abo yukokisi mi mapoo misikedibaso, eseme mi sebege saga palaso. <sup>6</sup> Esino osoko pa oso dei moodoome silikaloso weidaso, bei too mi ma kulomoo gameilega. <sup>7</sup> Osoloso ko abo we ti bei kookoone poogoo omapoo misikedibaso, eseme we ti ko sabolo palaso. Esino we tiso ko eyo bou tia deme dadailoso ko pele poogooso. <sup>8</sup> Osoloso ko abo mi medee tekepo mapoo misikediba oso medee tekepo kauwa palaso. Osoloso ko paso, su aboso ko 30 egeesi paso, osoloso abo ko 60 egeesi paso, osoloso abo ko 100 egeesi paso.”

<sup>9</sup> Yesuye egeese takaso, “No dulu bolo daga, ayo hagee takoo nayo medee dui.”

*Yesuye dio masi taka goo eyo bei  
(Matiyu 13:10-17, Luka 8:9-10)*

<sup>10</sup> Hamamee Yesu obusomo badebeeno, o hamamee dili 12 odoo sabolo, osoloso odoo abo yimapoo mooloogoo doloso debei odoo oso yimapoo, yayo dio masi taka goo eyo bei woosaso. <sup>11</sup> Yayo dimapoo nei takaso, “Gode-eye wiligi doloso badeli goo ee yayo mada magoloso meleeso, esino nimapoo woola yilige pigileiso. Esino peegoo debeli odoo mapoo dio

masi takalaiso. <sup>12</sup> Esiga Aisayaye taka hagee peegoo debeli odo magaa taka,  
 ‘Diayo medee hodu dilesa agalaiso,  
     esino goo eyo bei diayo ogoloso  
     gooleedalaime.  
 Osoloso diba medee hodu dilesa to taka duleiso,  
     esino goo eyo bei diayo medee  
     gooleedalaime.  
 Diayo gooleedoo diepi, dibada goo tokenee magaa  
     waki pialoso,  
     Godeeyo goo tokenee hapoloso boobado pig-  
     iliyo,’ diso.”

*Yesuye ko segei eyo bei taka  
 (Matiyu 13:18-23, Luka 8:11-15)*

<sup>13</sup> Yesuye o hamamee dili sabolo odo abo dimapoo takaso, “Bei kasee magaa niba dio masi hagee medee gooleedelega ka pagala? Niba dio masi hagee eyo bei niyo medee gooleedelega poogooga, dio masi abo nimapoo ayo takooga niyo kasee gooleedalaisomo? <sup>14</sup> Ko edebeeyo kukopigili ee Godeeyo to oso, osoloso yayo to egee odo mapoo takeliso. <sup>15</sup> Esiga ko abo eli domopoo kukodipume soso sibilesa ne odo abo egeesi masi doso. Diba Godeeyo to duliso, esino Saite-neeye dimapoo saga boobado pigili goo teneega, Godeeyo to diayo goolee melega boobado pigiliso. <sup>16</sup> Esiga odo abo ko yukokisi mi mapoo misiked-iba egeesi masi doso, diba Godeeyo to taka duloso goomoga sabolo teliso. <sup>17</sup> Esino dibada sooloo ma kulodu too meilega, diba beeamo deiyepo mapoo dooso, Godeeyo to du magaa hegi goo sabolo dala goo sabolo siboga, opulone tei too saga pegeliso.



18 Esiga odoo abo ko we ti bei kookoone poogoo mi omapoo misikediba egeesi masi doso, diba Godeeyo to tekepo duliso. 19 Esino mi toowa hageeyo giebadili goolee sabolo, osoloso bi bei doloso badalai goolee sabolo, osoloso tokenee goo goolee sabolo oso dibada sooloo ma kulodu goo goolee tiadoga, Godeeyo to dibada sooloo ma kulodu pelega dadailoso ko pelega pegeliso. 20 Esino odoo abo ko mi medee tekepo mapoo misikediba egeesi masi doso, diba Godeeyo to duloso tei teliso. Osoloso diba Godeeyo to duloso dibada sooloo ma kulodu Godeeyo to oso ko masi peliso, su aboso ko pa 30 egeesi peliso, abo ko 60 egeesi peliso, osoloso abo ko 100 egeesi peliso.”

*Keme maga dio masi taka goo  
(Luka 8:16-18)*

21 Esemme Yesuye dimapoo dio masi takolone woosaso, “Odoos heeso keme poulosos gadeep-ugu ee gooloogoolame, tolo ma hemidu o debi ma hemidu mada magalaisomo? Haye, yo keme poulosos dokodoo woola magalaiso, keme gadeepigilame. 22 Bi susuga epedee hamapoo mada egee molo, see hamamee gooleedalame gadeepugu mapoo woola peledabalaiso. 23 No dulu bolo daga, ayo hagee takoo nayo medee dui.”

24 Yesuye dimapoo egeesee takaso, “To niyo du medee goolee. Niba to hagee medee dia gooleedoga, goo abo niyo medee gooleedalaiso. 25 Odoos agayo to tekepo gooleedoga, Godeeye yimapoo goo goolee dia tekepo abo tenalaiso, esino odoo hee agayo to tekepo medee dulega poogooga, goo

goolee tekepo yimapoo egee molo see Godeeye talaiso.”

*Yesuye kakomee ko masi, o hu witi, oso pala amaga dio masi taka*

*(Matiyu 13:31-34, Luka 13:18-19)*

<sup>26</sup> Yesuye dio masi egeese takaso, “Godeeye wiligi doloso badeli goo edebeeyo kakomee ko masi, o hu wit, segei egeesi masi moloso.

<sup>27</sup> Osoloso yo beame susuga, gesi susuga tialo hogabuo tialo hogabuo dolone witi ko oso pala yo gooleede. <sup>28</sup> Witi ko segei eyo mi naga obusomo peliso. Osoloso kawulone daga bou gasibiliso, osoloso du teliso, osoloso hamameedee ko peliso.

<sup>29</sup> Witi ko segei poloso telegeega segeli odoososo dileso gwaliso.”

*Homokoko pepoko maga dio masi taka goo*

<sup>30</sup> Yesuye egeese takaso, “Godeeye wiligi doloso badeli eyo goo ayo dio hee maga nimapoo takalaiso. <sup>31</sup> Esiga Godeeye wiligi doloso badeli eyo goo edebeeyo homokoko dia pepoko toloso segei egeesi masi moloso. <sup>32</sup> Esino homokoko dia pepoko segei oso kawudoga toowa poloso homolee ee ma kulodu homo su hagoso toowa malaiso. Osoloso homo dee diadee omapoo sóso sibilesos hemiye omapoo ou takalaiso.”

<sup>33</sup> Yesuye odoosomapoo dio masi maga Godeeye to takomo siliso, eseme dio masi taka oso dibada goo goolee sabolo tebiaso. <sup>34</sup> Yayo odoosusuga mapoo hedepe dio masi maga takemeliso. Esino Yesu o hamamee dili odoosabolo disono dopolone dio masi oposusu eyo bei dimapoo takeliso.

*Yesuye i sabolo howo ki sabolo hamaga taka  
(Matiyu 8:23-27, Luka 8:22-25)*

<sup>35</sup> Beame hedepe oso osoko olo moume, Yesu o hamamee dili odoo dimapoo egeesee takaso, “Iba abei hodiokoo dalo soowomo.” <sup>36</sup> Esemé Yesu odoo abo pogoloso, hedepe o hamamee dili odoo sabolo du maga abei daso. Esino odoo abo du hee mapoo toboloso hamamee daso. <sup>37</sup> Diba olo abei domopoo damolome i toowa simi oso howo ki sabolo sibulone dibada du ma kulodu howo sasooso. Esino diba abei osee damolome howo sasoo oso dibada du howomoo oulame siso. <sup>38</sup> Esino Yesu yo du osio mapoo wolomai wolo-maloso tiameleeso. Esemé o hamamee dili odoo diayo yo tidipuguloso yimapoo egeesee takaso, “Eligili odoo, iba howomoo meilame hagee see nayo iba sooloo dolosomo?”

<sup>39</sup> Yesu diayo to taka duloso toboloso i sabolo howo ki sabolo omapoo egeesee takaso, “Epedee hamapoo koodobie!” Esemé i sabolo howo ki sabolo o to duloso, saga koodobiaso.

<sup>40</sup> Osoloso see Yesuye dimapoo egeesee takaso, “Niba kaseega ka ebiala? Niba amapoo tei too meyo?”

<sup>41</sup> Yesu o hamamee dili odoo diba dia obume disono nei woosa nei woosa dolone egeesee takaso, “Hagee odoo ogumo? Yayo i sabolo howo ki sabolo omapoo takeme o to duloso koodobiaso.”

## 5

*Yesuye odoo bo holo pala moodoo  
(Matiyu 8:28-34, Luka 8:26-39)*

<sup>1</sup> Esiga Yesu o hamamee dili odoosabolo Gelili abei daso. Osoloso dibada du Gelasa mosobia dibada mi su mapoo oluguso. <sup>2</sup> Osoloso diba du olo oluguloso, Yesu yo mubi dokodoo polomeleeno, odoosabolo pala oso odoosabolo bi maga Yesu mapoo simiso. <sup>3</sup> Odoosabolo hagee beeame susuga odoosabolo bi mapoo badeli, yo kitulugu toowaga edebeeyo yo ki tiso koo tialekili. <sup>4</sup> Beeame susuga o homo sabolo dee sabolo ki tiso tialokoloso magooga eyo kitulugu oso ki ti kokisa pigiliso. Esiga edebeeyo yo balai eli opupa meli. <sup>5</sup> Beeame susuga osoloso gesi susuga odoosabolo bi mapoo osoloso esia mapoo eyo nediliyo yoso kolo kookoome gwa sabolo siliso.

<sup>6</sup> Yesu eli sage hoogooga sibumolome, odoosabolo yo Yesu ogoloso yo tugodalame hoguodiso. Osoloso o homo beiyopoo gawuaso. <sup>7-8</sup> Esemee Yesuye yimapoo egeesee takaso, “Bo holo, no odoosabolo yimaga peegoo gadi.” Esino bo holo pala odoosabolo neligi agadulone egeesee takaso, “Yesu dokodoo badeli Godeeyo owolo, no ogoosabolo talame amapoo ka simiyo? Godeeyo goo maga amapoo dala toowa na tenee!”

<sup>9</sup> Osoloso Yesuye see egeesee takaso, “Nee hu ogumo?”

Esemee odoosabolo to nei yimapoo egeesee takaso, “Mo hu Bei, bei iba bei odoosabolo hageeyo kulodu.”

<sup>10</sup> Osoloso bo holo oso Yesu mapoo see howa see howa diso, bo holo mi hee mapoo seeseep eegeeyaga.

<sup>11</sup> Esino koola mapoo esia dokodoo be hu bei mooloogoo doloso, mi nalagamo sile sibiso.

<sup>12</sup> Esemee bo holo oso Yesu mapoo see howaso,

“Nayo iba be mapoo palame seese pagalai soowayo?” diso. <sup>13</sup> Esemé Yesúye diba be ma kulodu gasoowadee neme, bo holo odo ma kuloduga galagasibileso see be ma kulodu soowadeeso. Esemé be bei 2,000 egesi oso esia dokodooga abei mapoo kuko meileso abei ma kulodu weidaso.

<sup>14</sup> Be gi debeli odo oso goo hagee ogoloso kuko dulone mi toowa mapoo osoloso mi pepoko abo mapoo takomo diso. Esemé odo susuga to hagee duloso, diba agalame sibadeeso. <sup>15</sup> Odo susuga Yesu mapoo sibileso mooloogoodooso, esino odo bo holo pala see tekepo poloso, goo tekepo gooleme dugo tekepo kaloso, Yesubolo badoboome ogoloso dia ebiaso. <sup>16</sup> Be gi debeli odo diayo goo odo mapoo peledapa sabolo be mapoo peledapa sabolo ogoloso odo susuga mapoo takaso. <sup>17</sup> Osoloso odo mooloogoodoo susuga oso to hagee duloso, Yesu mapoo see howa see howa diso, “No hamaga peegoo di!” diso.

<sup>18</sup> Yesu dilame du mapoo topome, odo daga bo holo polome Yesúye moodoo oso Yesu mapoo egeesee howaso, “A nobolo dilei goomogo.” <sup>19</sup> Esino Yesúye yimapoo egeesee takaso, “Haye, no mosopoo wedi dileso, Lodeeye sooloo dolone goo tekepo namapoo moodoo nemisi dimapoo takalame di,” diso. <sup>20</sup> Esemé odo see abaga wedi dino Dekapolisi mi mapoo mosobia 10 mapoo takomo diso. Odo susuga yayo taka duloso dia howoogaso.

*Yesu mapoo tei teme nei yayo odo paiye*

*moodoo**(Matiyu 9:18-26, Luka 8:40-56)*

<sup>21</sup> Yesu o hamamee dili odoo sabolo abei dala soowaso, osoloso abei palaga mapoo odoo susuga yimapoo mooloogoodooso. <sup>22</sup> Mi omapoo Yu odoowo howo gisili moso mapoo wiligi odoo toba, o hu Yailas, yayo Yesu ogoloso o homo beiyopoo gawuaso. <sup>23</sup> Osoloso yayo see Yesu mapoo howaso, “Mo sobo holo paiye moodoolame, yo talai koola tapa, esiga nee deeso yo sigilame sibe, yo paiye wediloso, see gie badalame.”

<sup>24</sup> Esemé Yesu yibolo dime odoo mooloogoodoo susuga hamamee yo pupugamo diso. <sup>25</sup> Osoloso mooloogoodoo eyo kulodu sobo aso woloma oso sawo dimili ososee dugo 12 poogooso. <sup>26</sup> Sobo yo melesenee neli odoo bei mapoo diayo pidilame dugo susuga dimiliso, esino diayo yimapoo dala toowa tenemeleeso. Osoloso yayo dimapoo melesenee talame, melesenee eyo nei magolone o molee susuga hosudooso, esino yo sawo dimili koodobilega see toowa poloso, sawo osee dimiliso. <sup>27</sup> Esino sobo yo daga Yesuye odoo tekepo moodoomo sili dulosó, yo odoo mooloogoodoo kuloduga Yesuwo miligiyo hamamee sibilesó o dugo sage yayo ka mapoo sigeso. <sup>28</sup> Sobo yayo goolee Yesuwo dugo sigoga yo wedilei gooleeso. <sup>29</sup> Yayo Yesuwo dugo sigime sawo dimili saga koodobiaso. Esemé yo eyo egeesee gooleeso, “Sawo dimili tekepo pa,” gooleeso.

<sup>30</sup> Yesu eyo gooleeno odoo moodeli kitulugu yimaga peegoo di neme, yo odoo mooloogoodoo mapoo hodio bidi puguloso egeesee takaso, “Ede-

beeyo mo dugo sigo. Ayo gooleedalaiya, mo dugo odoo agayo sigoba.”

<sup>31</sup> Eseme o hamamee dili odoo oso yimapoo egeesee takaso, “Odoo mooloogoodoo susuga nama hodu kokosooso. Esiga nayo kasalame, ‘Edebeeyo mo dugo sigo. Ayo gooleedalaiya, mo dugo odoo agayo sigoba’ doloso ka takala? Bei odoo susuga oso nama sigoso.”

<sup>32</sup> Yesu odoo mooloogoodoo kulodu osee esia meleeso, yo odoo agayo sigebeleeso. <sup>33</sup> Esino sobo Yesuwo dugo sige oso eyono moodoo goolee puguloso obulone kikilika sabolo sibilesa o homo beiyopoo badebeiso, osoloso eyo goo moodoo Yesu mapoo takaso. <sup>34</sup> Yesuye nei yimapoo egeesee takaso, “Mo holo, no amapoo tei too maga no tekepo moodooso, esiga no Godeeyo mesie goo sabolo di. No olo weidooso.”

<sup>35</sup> Yesu to osee takomolome, odoo abo Yailas eyo moso abaga sibilesa Yailas mapoo egeesee takaso, “Nee sobo holo taso. Esiga eligili odoo yo ido sibilei goo hee mauwe, yo haga na goolee.”

<sup>36</sup> Esino Yesu diayo taka to telega pogoloso Yailas mapoo egeesee takaso, “No haga na ebi, wulo amapoo tei te.”

<sup>37</sup> Osoloso Yesuye egeesee takaso, “Odoo susuga, niba deebese,” doloso hedepe Pita, Yemes, Yonee, osoloso Yailus esee Yesubolo diso. <sup>38</sup> Diba abaga dino Yailas eyo moso mapoo peledoboloso, odoo susuga to boowa sabolo pupusuga molome egeiso. <sup>39</sup> Yesu moso kulodu gadilesa odoo susuga dimapoo egeesee takaso, “Niba kaseega to boowa sabolo ka pupusuga malala? Sobo holo yo tele,

yo wulo tia moloso.” <sup>40</sup> Odoosusuga Yesuye to taka duloso sisiyiligaso.

Eseme Yesuye odoosusuga dimapoo egeesee takaso, “Niba moso kuloduga peegoo galagadi,” diso. Osoloso Yesu yo sobo holo oso tia melee debi mapoo dulone hedepe oma dio owee dio osoloso o hamamee dili odoosabolo kulodugadiso. <sup>41</sup> Yesuye sobo holo ta o dee mapoo toloso yimapoo egeesee takaso, “Talita koum!” (To eyo bei sobo holo, no teebee.) <sup>42</sup> Eseme sobo holo yo epedee omapoo saga toboloso siliso (yo dugo 12). Eseme oma dio owee dio, osoloso Yesu o hamamee dili odoosabolo dia howoogaso. <sup>43</sup> Yesuye dimapoo to kitulugu sabolo egeesee takaso, “Ayo sobo holo hagee wedilame moodoo niyo odooshee mapoo na takee,” diso. Osoloso oma dio owee dio mapoo Yesuye egeesee takaso, “Nibada sobo holo nei nali bi tenee,” diso.

## 6

### *Naselet odoososo Yesu gowe (Matiyu 13:53-58, Luka 4:16-30)*

<sup>1</sup> Yesu o hamamee dili odoosabolo mi toowa omaga see o midee Naselet mapoo diso. <sup>2</sup> Osoloso Yu odoowo tei beame hee mapoo howo gisili moso kulodu yayo odoosusuga eligiso. Osoloso odoosusuga o to duloso howoogaso.

Eseme diba disono nei woosa nei woosa doloso egeesee woosaso, “Yo goo susuga hagee kasee gooleedoowo? Yo goo goolee medee tekepo. Yo goo mudu opusomodi moodeli kitulugu kapoo toowo?” <sup>3</sup> Yo wulo moso tekeli odoosoloso Meliyo owolo, osoloso yo Yemes, Yoses, Yudas,



osoloso Saimonbolo dibada emei, osoloso oboba ibolo doso,” diso. Osoloso diayo egeesee goolee maga Yesuye eligi dulei goweso.

<sup>4</sup> Esemé Yesuye dimapoo takaso, “Odoó susuga oso Godeeyo to tosili odoó eyo hu poudiliso. Esino o mosobia odoó sabolo osoloso o soosoo sabolo o moso kulodu debeli odoó oso o hu koo poudili.”

<sup>5</sup> Esino bei diayo Yesu mapoo gowoolone tei too mauwe pogoloso debei egeme, goo mudu opusomodi toowa yayo moodoole poogooso. Esino odoó paigiga abo o deeso sigime weido diso.

<sup>6</sup> Yesu diayo yimapoo tei too mauwe poogoo ogoloso dia hoowaso. Esemé Yesu Naselet mi amaga see pogoloso dilesó mi pepoko abo mapoo Godeeyo to eligimo siliso.

*Yesuye o hamamee dili odoó 12 diye di  
(Matiyu 10:5-15, Luka 9:1-6)*

<sup>7</sup> Yesu o hamamee dili odoó 12 gilimadoloso diso nediliyo puloso bakadio toopoo bakadio toopoo doloso mi opusomo opusomodi mapoo diye diso. Yayo diba diye dolone bo holo pala peegoo hasisilame kitulugu dimapoo teneeso.

<sup>8</sup> Yesuye dimapoo egeesee takaso, “Niba dulone bi abo na te, esino niba wulo susu toloso diadee. Osoloso nei sabolo, o sabolo osoloso molee sabolo toloso na diadee.”

<sup>9</sup> Esino homo mapoo kali sabolo osoloso dugo niso ka hedepe egee mouloso dulone, dugo kali bi abo na te.” <sup>10</sup> Yesuye dimapoo takaso, “Niyo mi omapoo dilesó peledobooga beame omapoo mosobia oso goomogolone moso teneega, moso hedepe omapoo dobosó mi hee mapoo dulone ka poogoo di. <sup>11</sup> Esino mi kamapoo

niyo dileso peledaba beeame omapoo mosobia oso goomogolega pogoloso nimapoo moso sabolo tenelega, osoloso nibada to mapoo tei telega poogooga, mi egee pogoloso diadee. Osoloso niyo mi egee pogoloso dulone, dibada howo woola omapoo nibada homo mi mapoo basago taloso peegee. Bei diayo nibada to mapoo tei telega poogooga, Godeeye dimapoo dala tenelai goo ee eligilame,” diso.

<sup>12</sup> Esemee Yesu o hamamee dili odoo diayo dileso odoo susuga mapoo Godeeyo to takomo sile sibilone egeesee takaso, “Nibada goo goolee su wuduloso goo tokenee maga waki pie,” diso.

<sup>13</sup> Osoloso bo holo odoo ma kulodu paladee diayo peegoo hasiso pugudolone debeiso. Osoloso odoo paigiga sabolo diayo wolo iso dibada wiligi mapoo soome paigiga weido diso.

### *Yonee Odoe Howo Sauwidili oso ta*

<sup>14</sup> Mi susuga mapoo odoo susuga oso Yesuwo goo takamo dime wiligi toba Helodeeye duloso gooleedooso. Odoe aboso egeesee takaso, “Yo Yonee Odoe Howo Sauwidili ta maga see hogabia, esiga kitulugu goo toowa hagee yima kuloduga tou ka to,” diso.

<sup>15</sup> Odoe aboso egeesee takaso, “Yo Ilaisa.”

Osoloso odoo aboso egeesee takaso, “Yo Godeeyo to tosili odoo daga Godeeyo to medee tekepo tosili egesi masi bado,” diso.

<sup>16</sup> Esino Helodee goo hagee duloso, gooleedeme yayo egeesee takaso, “Yonee Odoe Howo Sauwidili, o wiligi kopugume ta odoo, yo see ta maga hogabia doo,” diso.

(Yonee telega badolone, daga goo peledaba hagosu.) <sup>17-20</sup> Helodeeyo omolo Pilipiyo sobo Helodies see Helodeeye peedeedoloso hume, Yoneeye Helodee mapoo egeesee takaso, “Nayo no molowo sobo see nayo peedeedoloso hulei tekeponee,” diso. Osoloso Helodieseeye kemeneme Helodee mapoo dilesos egeesee takaso, “Nayo Yonee neliga ma kulodu magee,” diso. Esemeyayo Yonee neliga ma kulodu magalame o ha teli odoodiye dee takeme, diayo dilesos yo neliga mapoo magooso. Esino Helodies Yonee mapoo hegilone, yayo yo wolomalame gooleeso. Esino yayo yo wolomele, bei Helodee Yonee wolomalai ebiaso. Yo gooleedooso Godeeyo howo woola Yonee goo tokenee mauwe, osoloso yo odoomedee tekepo. Esigayayo Yonee medee bameleeso. Yo Yoneeyo to duloso goo dia tiadiliso, esino o to mapoo dulei goomogolone o sooloo ma kulodu goomogeliso.

<sup>21</sup> Esino hamamee Helodies mapoo Yonee wolomalame beame tekeposo yimapoo simiso. Helodee soomagoo beame mapoo wo toowa nalame gamalee wiligi tebisa sabolo osoloso o ha teli wiligi odootebisa sabolo osoloso Gelili mi toowa ma kulodu wiligi tebisaloso debei odoosabolo Helodeeye gilimadoloso mooloogoodooso.

<sup>22</sup> Diba wo nolone dohome Helodiesyo owolo sobo holoso diayo wo nolone debei moso ma kulodu gasibilesos goomoga teneelone habaso. Esemeyayo Helodeeye sobo yimapoo takaso, “Nayo goomoga goo amapoo takee, ayo bi egee namapoo tenelaiya,” diso. <sup>23</sup> Helodeeye badolone tei goo see takaso, “Nayo goomoga goo amapoo takooga,

ayo namapoo tenelaiso. Osoloso mi ayo hagee bamolo su sabolo nayo goomogoga, ayo namapoo tenelaiso.”

<sup>24</sup> Esemе sobo yayo owee Helodies mapoo dileso, yayo goomoga goo dulame diso.

Esemе sobo owee Helodiesye nei takaso, “Nayo goomoga Yonee Odoо Howo Sauwidili eyo wiligi goomogo dee takee.”

<sup>25</sup> Esemе yayo oweeyo to duloso, saga wedi dileso Helodee mapoo egeesee takaso, “A epedee hamapoo Yonee Odoо Howo Sauwidili eyo wiligi koodoloso tolo mapoo magoloso tosiboga ee talai goomogo,” diso. <sup>26</sup> Helodeeye to hagee dume yo dia goo heleso. Esino yo odoо susuga eyo howo woola mapoo eyo tei magoo ee gobabilei ebiaso. Esemе yayo sobo o to mapoo gowoole. <sup>27-28</sup> Osoloso Helodeeye o ha teli odoо hee neliga moso gibali oso Yoneeyo wiligi kodolame diye diso. Esemе yayo neliga moso tegei mapoo dileso Yoneeyo wiligi koodoloso, odoо susuga oso agalame tolo mapoo magoloso, odoо howo woola tosibileso sobo mapoo teneeso. Esemе sobo yayo toloso owee mapoo teneeso. <sup>29</sup> Yonee o hamamee dili oso goo hagee dume, diayo sibileso o su toloso wulu odoо toga tooseli omapoo kulodu magooso.

*Yesuye sobo sabolo, holaiso sabolo, osoloso gisowe 5,000 mapoo nei pi*

*(Matiyu 14:13-21, Luka 9:10-17, Yonee 6:1-14)*

<sup>30</sup> Yesuye diye di odoо see wedige sibileso, diayo goo moodoo sabolo diayo goo eligi susuga sabolo Yesu mapoo opusususo. <sup>31</sup> Odoо susuga Yesuye badebei omapoo dile see sibo di oso, Yesu

o hamamee dili odo sabolo nei nalai beame tekepo egele. Esemé Yesúe o hamamee dili odo mapoo egeese takaso, “Iba ibusomo odo mauwe poogoo mi mapoo dileso hasalame dimo,” diso.

<sup>32-33</sup> Esemé Yesú o hamamee dili odo sabolo du ma kulodu bulumaloso, abei hodiokoo odo koola mauwe mi mapoo dalo soowoolame moumeleeno, odo abei palaga debei oso ogoloso gooleedooso. Esemé odo susuga oso mi opusomo opusomodi maga Yesúe di mi mapoo malalo mili hoguga diadeeso. Diba malalo dileso balaga meleeno, Yesú o hamamee dili odo sabolo du maga sibilesó gimagooso. <sup>34</sup> Osoloso Yesú du maga mi mapoo pubalogoloso, odo susuga mooloogoodoloso debei ogoloso, yayo diba dia sooloo dalaso, bei sipi be hu masi bali odo mauwe pogoloso dohome. Esemé yayo goo susuga dimapoo eligiso.

<sup>35</sup> Osoko olo todobume, Yesú o hamamee dili odo oso yimapoo sibilesó egeese takaso, “Osoko olo todobuo, osoloso mi hagee moso sabolo nei nalai sabolo mauwe. <sup>36</sup> Esiga nayo odo susuga hagee diye dee takee. Osoloso diba dileso, mi koola mapoo diso moleeso nei toloso nalame,” diso.

<sup>37</sup> Esino Yesúe o hamamee dili odo mapoo nei takaso, “Diayo nei nalai niso toloso tenee,” diso.

Diayo Yesú mapoo takaso, “Iyo nei toloso dimapoo teneega, 200 molee toowaso teli, esino iba molee mauwe.”

<sup>38</sup> Esemé Yesúe dimapoo woosaso, “Diba wo kasolo molosomo? Niyo agalame di.”

Eseme diayo dileso egeme, diayo yimapoo takaso, “Wo dee tiadoo osoloso di bakadio moloso,” diso.

<sup>39</sup> Eseme Yesuye o hamamee dili odoo mapoo egeesee takaso, “Odoosusuga mapoo, ‘Niba mi mapoo pepoko mooloogoodoloso buluma mooloogoodoloso buluma,’ dee takee,” diso.

<sup>40</sup> Eseme dimapoo takeme, diba mooloogoodoo opusomo opusomo doloso mooloogoodoo hee mapoo odoo 100 osoloso mooloogoodoo hee mapoo odoo 50 doloso bulumaso. <sup>41</sup> Eseme

Yesuye wo dee tiadoo sabolo di bakadio sabolo toloso, keimi ma dokodoo bolone, Godeeye nei pidilame goomoga goo todagaso. Osoloso yayo wo popeiloso di sabolo agisaloso o hamamee dili odoo mapoo piso, diayo odoo susuga mapoo pilame. Eseme diayo wo sabolo di hwei sabolo odoo susuga mapoo piso. <sup>42</sup> Eseme odoo susuga

nei tebia nega dia edigaso. <sup>43</sup> Osoloso diayo nei naloso abo poogoo, Yesu o hamamee dili odoo oso misigamo di bou tegei 12 metamagisaso.

<sup>44</sup> Osoloso sobo sabolo holaiso sabolo nei nešo. Esino mooloogoodoo eyo kulodu gisowe hesiga 5,000 oso nei ka ne.

*Yesuye howo dokodooga di  
(Matiyu 14:22-33, Yonee 6:15-21)*

<sup>45</sup> Diba nei nalaga koodobuloso, Yesu o hamamee dili odoo malalo du maga Betesaida mi mapoo diye doloso, diba abei damolome, Yesuye odoo susuga dibada mi mapoo diye diso. <sup>46</sup> Osoloso Yesuye odoo susuga diye doloso,

yo obusomo Godee mapoo toodagalame mubi dokodoo palaso.

<sup>47</sup> Gesi domo o hamamee dili odoo dibada du maga abei domo damolome, Yesu yo obusomo mubi dokodoo badebeiso. <sup>48</sup> Yesu mubi dokodoo badolone egeino, poo sabolo howo ki sabolo simi oso, o hamamee dili odoo dia du mapoo woome, diba kwasu sabolo du sulugamo diadaga molome egeiso. Osoloso gesikolo kudi olo tadageme, yo howo dokodooga diba daga dilame dimeleeso. <sup>49</sup> Esino o hamamee dili odoo diayo Yesu howo dokodooga dimelee egeme, diayo goolee bo belee dolone diba yo ogoloso googaso. <sup>50</sup> Yesu o hamamee dili odoo oso yo ogoloso obugume dimapoo egeese takaso, "Haga na ebi. Aso." <sup>51</sup> Osoloso Yesu yo du mapoo dapogome, howo ki sabolo poo sabolo saga koodobiaso. Esemé Yesu o hamamee dili odoo goo hagee ogoloso dia howoogaso. <sup>52</sup> Diba Yesuwo kitulugu gooleedoo diepi, diba howoogele pegiliyo. Esino diba howoogaso, bei dibada sooloo kalawaga.

<sup>53</sup> Osoloso diba abei daloso abei hodiokoo Gene-salet mi mapoo dibada du oluguso. <sup>54</sup> Diba du oluguloso mubiyodoo dalaga poogoome, odoo omapoo tebisa melee oso yo kibiya hoodo egeiso. <sup>55</sup> Odoo susuga mi opusomo opusomodi mapoo hogugo dilesó, odoo paigiga dibada kida mapoo tiedigaloso Yesu mapoo emigado sibadeeso. <sup>56</sup> Yesu mi opusomo opusomodi mapoo silime, edebeeyo odoo paigiga kida mapoo tieduloso, bi teli go mapoo emigado sibilesó magooso. Osoloso odoo paigiga oso Yesu o dugo sage ka pee mapoo sigilame howoogaso. Esemé diayo

o dugo sigeme wegiga dooso.

## 7

*Godeeye tei eligi goo sabolo edebeeyo tei eligi  
goo sabolo*

*(Matiyu 15:1-9)*

<sup>1</sup> Beeame hedepeso Pelisi odoos sabolo tei eligili odoos abo sabolo Yoluselem mi amaga sibilesos Yesu mapoos mooloogoodoos. <sup>2</sup> Osolosos diayo egeino, Yesu o hamamee dili odoos abo oso Yu odoowo tei dedelega pogolosos nei nalame dibada dee howo koo hapagali. <sup>3</sup> (Esino Yu odoos sabolo Pelisi odoos sabolo dibada odooga dia tei eligi goo dodolone daga nei nalame dee howo hapagaliso. <sup>4</sup> Diba bi teli go mapoos bi tolosos nala pogolone daga dibada dee medee howo hapagalosos ka nali. Osolosos dibada odooga dia tei eligi goo dodolone dibada kapu sabolo sosepeni sabolo osolosos diso sabolo howo hapagaliso.)

<sup>5</sup> Esemes Pelisi odoos sabolo tei eligili odoos oso Yesu mapoos woosaso, “Bei kasimaga nee hamamee dili odoos ibada odooga dia tei eligi goo dedelega ka pagala? Diba dee howo hapegelega nei naliso,” diso.

<sup>6</sup> Yesuye to nei dimapoos takaso, “Godeeyo to tosili odoos hee Aisayaye daga hoogoo tei goo olo takaso, googooloo bakadio gweli odoos nimapoos. Osolosos Aisayaye see tobu takaso,

‘Dibada magaso amapoos goomogolone mo hu dokodoo poudiliso, esino dibada sooloo ma kulodu mesili goo me.



<sup>7</sup> Diayo amapoo goomogolone mo hu dokodoo poudili eyo kulodu goo hee me, bei ede-beeyo tei goo eligi, diayo Godeeyo tei masi odo mapoo eligiliso.’

<sup>8</sup> Niba Godeeyo tei goo eligi pogoloso, see nibada odooga dia tei goo eligi deedeeso.

<sup>9</sup> Yesuye dimapoo see tobu egeese takaso, “Niba Godeeyo tei goo eligi goo peegoo magoona. Osoloso nibada odooga dia tei eligi goo talame.

<sup>10</sup> Esiga daga hoogoo Moseseeye tei goo Godee maga simi nimapoo tenee hagoso,

‘Nama dio noowee dio oso to taka duloso dimapoo mesie. Esino odo agayo oma dio owee dio mapoo to tokenee takooga, yo wolomalaiso.’

<sup>11</sup> Esino niyo egeese takiliso, ‘Soowa, edebeeyo oma dio owee dio mapoo takoo, “Emegei, niba ayo pidileime, bei molee amapoo egee molo Godee mapoo tenelame siga. Molee egee ibada toso hedi koloban.’ ” <sup>12</sup> Niyo odo owee dio oma dio ee pidilei tei magooso. <sup>13</sup> Niyo tei magoo ee dodolone Godeeyo tei magoo peegoo magolone ka doso. Osoloso niba goo abo susuga egeese masi tomo silesiboso.”

*Odo sooloo ma kulodu Godeeyo howo woola tokenee peli goo*

*(Matiyu 15:10-20)*

<sup>14</sup> Esem Yesu odo mooloogoodoo see gili-madoloso, dimapoo egeese takaso, “Niba mo to medee dui, osoloso goo goolee medee te.

<sup>15</sup> Esiga edebeeyo nei nali oso o sooloo ma kulodu Godeeyo howo woola tokenee koo peli. Esino odo o sooloo ma kulodu goo gooleemeleso, to

tokenee taka sabolo, osoloso yayo goo tokenee tomo sili oso, o sooloo ma kulodu Godeeyo howo woola tokenee peliso. <sup>16</sup> Niba dulu bolo daga, ayo hagee takoo niyo medee dui,” diso.\*

<sup>17</sup> Eseme Yesuye odoo mooloogoodoo poo-goo dileso, moso kulodu gadime, o hamamee dili odoo oso dileso egeesee takaso, “Nayo dio masi taka goo eyo bei imapoo medee takee,” diso. <sup>18-19</sup> Eseme Yesuye dimapoo egeesee takaso, “Niba goo eyo kulodu bei medee koo gooleedolo? Esiga niyo nei toloso nali oso nibada sooloo ma kulodu Godeeyo howo woola tokenee koo peli, bei nei nali bi egee sooloo ma kulodu koo gameli. Esino kakobo ma kulodu gameilesa see peegoo gasibiliso.” (Yesuye goo hagee takolone, yayo kitulugu sabolo takaso, nei nali bi susuga nalai tekepo, diso.)

<sup>20</sup> Esino Yesuye see egeesee takaso, “Odoosooloo ma kulodu goo gooleemeleso, to taka sabolo, osoloso yayo goo tokenee tomo sili oso, o sooloo ma kulodu Godeeyo howo woola tokenee peliso. <sup>21</sup> Esino odoo sooloo ma kulodu tokenee goo susuga hagee talame goo goolee sibiliso. Tokenee goo gweli, osoloso edebeeyo odoo hee mapoo giba nalame gweli goo, osoloso adaba bi heli talai goo, osoloso odoo wolomalai goo, osoloso gisoso adaba kooka sobo mapoo giba nalai goo, osoloso soboso adaba kooka giso mapoo giba nalai goo, <sup>22</sup> bi bei doloso badalai gweli goo, osoloso tokenee talai goo osoloso emegei

---

\* **7:16:** 7:16 To hagee odoo abo oso taka Makaye hogugu dee takeliso, esino odoo bei oso taka Makaye hogugule dee takeliso.

dimapoo gamenee takalai goo, osoloso odoo susuga eyo howo woola ebili goo talai, osoloso emegei dimapoo kweli goo, osoloso emegei dia hu maga takalai goo, osoloso suwa peli goo, osoloso goo tekepo goolee me sili. <sup>23</sup> Esiga tokenee goo susuga hagee talame odoo o sooloo ma kulodu goolee meleso toga, o sooloo ma kulodu Godeeyo howo woola tokenee peliso.”

*Yu dele poogoo sobo oso tei too goo  
(Matiyu 15:21-28)*

<sup>24</sup> Yesu o hamamee dili odoo sabolo mi egee pogoloso, Taya mi toowa koola mapoo diso. Osoloso yo dileso, odoo susuga oso yayo simi ogoloso gooleedeeyaga moso hee mapoo kulodu gapeleso mada badebeiso. Esino odoo susuga oso yayo simi goo ee duloso odoo abo mapoo saga takomo dime diba gooleedooso. <sup>25-26</sup> Esememe Yu dele poogoo sobo hedepe Ponesiya Siliya mi mapoo badeli oso Yesuwo goo dume, yayo badebei mi omapoo simiso. Yo sibilesu Yesuwo homo beiyopoo gawuloso badolone egeesee hoowaso, “Mo sobo holo bo holo pala badoso. Esiga nayo sibilesu o kulodu bo holo egee bado peegoo hailame sibe,” diso.

<sup>27</sup> (Yu odoo oso Yu dele poogoo odoo mapoo so, dee takeliso. Osoloso Yu odoo ee takolone odoo holaiso, deliso. Esememe sobo yayo goo egee moodoolai kitulugu tebia doloso yimapoo tei too malabeleso agalame) Yesuye sobo mapoo egeesee takaso, “Holaiso dia nei tolosu so mapoo tenelai tekeponee. Esino daga holaiso dimapoo nei tenelai tekepo,” diso.

<sup>28</sup> Eseme soboso Yesu mapoo nei takaso, “O Lodee, nayo tei takoo. Esino so moso hemidu silesibilone holaisoso nei ne kokou mou nalagamo silesibiliso,” diso.

<sup>29</sup> Eseme Yesuye sobo mapoo takaso, “Nayo amapoo to nei tekepo takaso. Esiga no mosopoo dilesos nowolo sobo holo mapoo ege, yo tekepo badoso. Bo holo epedee o beliye ma kulodu mauwe,” diso.

<sup>30</sup> Eseme yo o mosopoo dilesos, o sobo holo egeino bo holo o kulodu pala mauwe pogoloso, tekepo poloso debi mapoo wulo tia molome egeiso.

*Yesuye odoos dulu taba ibaya tekepo moodoo goo*

<sup>31</sup> Yesu o hamamee dili odoos sabolo Taya mi pogoloso Saidon mi mapoo peledabaso. Osolosos diba see abaga dino Dekapolisi mosobia mapoo peledobolosos, Gelili abei mapoo mousos.

<sup>32</sup> Osolosos odoos abosos odoos dulu taba ibaya Yesu mapoo idos siblesos howasos, yayos o deesos sigilosos tekepo palame.

<sup>33</sup> Yesuye odoos dulu taba ibaya odoos mooloo-goodos amagas peegos idos dilesos, Yesuwos dees wolugusos dulu taba ibaya eyos dulu os mapoo tulugulosos, makawos os dees mapoo pagas magulosos, odoos dulu taba ibaya eyos os mapoo sigesos.

<sup>34</sup> Osolosos Yesu keimos ma dokodoo bolonos sooloo toowa polomelesos homodopulosos yimapoo os tosos egeesee takasos, “Epata!” (tos eyos bei yiliga magee).

<sup>35</sup> Eseme epedee osmapoo dulu taba ibaya eyos dulu tekepo polosos tos takas os dulusos medees dusos, osolosos os osos tos medees kalame mimooloo-gosos.

<sup>36</sup> Osoloso Yesuye odoos susuga mapoo yayo goomoodoo na oposisi doloso, dimapoo to kitulugu sabolo takeliso. Esino yayo takolone diayo odoos abo mapoo na oposisi dee taka pogoloso, see odoos abo mapoo oposisiliso. <sup>37</sup> Esemee odoos susuga oso Yesuye goomoodoo dume dia howoogaso. Osoloso diayo see egeesee takaso, “Yesu goos susuga tomo sili medee tekepo. Iyo goolee edebeeyo odoos dulu tobaga ibaya tekepo koo moodoogamo silabelee dee. Esino yayo odoos dulu tobaga osoloso to koo kalakali yayo tekepo moodoogamo siliso.”

## 8

### *Yesuye 4,000 odoos mapoo nei pi goos (Matiyu 15:32-39)*

<sup>1-2</sup> Beeame heeso Yesuye goos eligi ee dulame see yimapoo odoos susuga mooloogoodoloso debeiso. Esino nei mauwe poogoome, Yesuye o hamamee dili odoos gilimadoloso dimapoo egeesee takaso, “Ayo odoos susuga hagee dia sooloo dolo, bei diba abolo dobolone beeame bakadio hedepedi poogooga. Esiga diayo nei nalai mauwe. <sup>3</sup> Osoloso ayo diba nei tenelega, dibada mosopoo diadee dee takooga, diba eli domopoo houdaso kitulugu me pogoloso howamadagalaiso, bei odoos abo dibada mi koola hapoonee,” diso.

<sup>4</sup> Esemee Yesu mapoo o hamamee dili odoos oso woosaso, “Nei mauwe, osoloso moso mauwe miwe poogoo mi hamapoo, iyo nei kamapoo tolosos odoos susuga hamapoo ka tenelaiyo?” diso.

<sup>5</sup> Esemee Yesuye o hamamee dili odoos mapoo egeesee woosaso, “Niba wo kasolo molosomo?”

Diayo nei takaso, “Iba wo 7 moloso,” diso.

<sup>6</sup> Eseme Yesuye odoosusuga mi mapoo bulume diso. Osoloso yayo wo 7 toloso Godee mapoo goomoga toodagoloso, wo popeiloso odoosusuga mapoo pilame o hamamee dili odoosusuga mapoo pise. Eseme diayo odoomooloogoodoo susuga mapoo pise. <sup>7</sup> Osoloso odoomooloogoodoo ma kulodu di pepoko abo molo egeiso. Eseme Yesuye di toloso Godee mapoo goomoga toodagoloso, o hamamee dili odoosusuga mapoo teneme, diayo toloso odoomooloogoodoo mapoo pise. <sup>8</sup> Eseme diba nei ne oso dia edigime, diayo nei naloso abo poogoo, Yesu o hamamee dili odoosusuga mapoo di, bou tegei 7 metamagisaso. <sup>9</sup> Esiga beame omapoo 4,000 odoosusuga mapoo di, bou tegei 7 metamagisaso. <sup>9</sup> Esiga beame omapoo 4,000 odoosusuga mapoo di, bou tegei 7 metamagisaso. <sup>10</sup> Osoloso diba diye doloso, Yesu o hamamee dili odoosusuga mapoo meilesodo ma kulodu bulumaloso, Dalmanuta mi mapoo dalo soowaso.

*Pelisi odoosusuga mapoo di, bou tegei 7 metamagisaso.*  
*(Matiyu 16:1-4)*

<sup>11</sup> Diba Dalmanuta mi mapoo soowooleso peledobome, Pelisi odoosusuga mapoo di, bou tegei 7 metamagisaso. <sup>11</sup> Diba Dalmanuta mi mapoo soowooleso peledobome, Pelisi odoosusuga mapoo di, bou tegei 7 metamagisaso. Bei diba goomogaso Yesu kitulugu tei Godee maga simibeleso kukuloso agalame. Egeese meleso, diayo Yesu mapoo goo mudu opusomodi moodee doloso takaso. <sup>12</sup> Eseme Yesuye goo hagee dume, yo diba goohelime sooloo toowa polomeleso homodopuloso takaso, “Bei kasimaga epedee beame

hamapoo odoo susuga hagee do oso goo mudu opusomodi moodoo ee agalame ka woosaliyo? Esiga ayo nimapoo tei goo taka, ayo goo mudu opusomodi odoo epedee beeame hamapoo hagee do omapoo niyo agalame see moodoolaime,” diso. <sup>13</sup> Osoloso Yesuye goo mudu opusomodi eligi koodobuloso, see o hamamee dili odoo gili-madoloso du mapoo meilesa, abei hodiokoo dalo soowaso.

*Yesuye wo habili maga dio masi taka goo  
(Matiyu 16:5-12)*

<sup>14</sup> Diba abei hodiokoo dalo soowoolone wo talai boobadopugunabu. Esino du ma kulodu wo hedepe molome egeiso. <sup>15</sup> Esemé Yesuye dimapoo kokodo takolone dio masi egeese takaso, “Niba obeeamo, bei Pelisi odoo sabolo Helodee dibada goo wo habili masi moloso. Osoloso wo giedege sabolo wo habia sabolo hamaga, wo giedege habia oso tokenee palaiso,” diso.

<sup>16</sup> Esemé diayo Yesuye taka duloso disono to boowooga meleso takaso, “Bei yayo egee takoo, iba wo telega soowooga ka takoo,” diso.

<sup>17</sup> Esino Yesu diayo to boowooga melee ogoloso, yayo dimapoo takaso, “Bei kasimaga niba nei mauwe poogoo ogoloso goo ka tiadowala? Niba ayo goo eligi omapoo ogoloso koo gooleedolo? Nibada sooloo ma kulodu goo ayo eligi ee gooleedoloso, nibada sooloo ma kulodu magalai dia kalawado? <sup>18-19</sup> Niba howo mauwega, egele ka pagala? Niba dulu mauwega, dule ka pagala? Niba ayo wo dee tiadoo 5,000 giso mapoo pi goo ee boobadoolo? Diayo nei naloso, wo abo

poogoome, niyo misigamo di bou tegei kasolo metamagisayo?" diso.

Diayo nei takaso, "Bou tegei 12."

<sup>20</sup> Esemé Yesuye see takaso," Ayo wo 7 4,000 odoó mapoo pi, wo abo poogoome, niyo misigamo di bou tegei kasolo metamagisayo?" diso.

Diayo nei takaso, "Bou tegei 7."

<sup>21</sup> Esemé Yesuye takaso, "Ayo odoó susuga mapoo wo pi goo ee niyo egeiso. Esino bei kasimaga Pelisi odoó sabolo Helodee dibada goo wo habili masi maga ayo hagee takoo niyo gooleedelega osee ka dabala?"

*Yesuye Betesaida mi omapoo odoó howo bakadio si moodoo goo*

<sup>22</sup> Osoloso diba Betesaida mi omapoo peledoboloso, odoó abo oso odoó howo bakadio si Yesu mapoo ido sibadeeso. Esemé diayo Yesu mapoo howoolone egeesee takaso, "Odoó hagee nee deeso sigoloso yo tekepo pe," diso. <sup>23</sup> Esemé Yesuye o hamamee dili odoó sabolo dulone, yayo odoó howo bakadio si eyo dee mapoo toloso mosobia amaga yo peegoo ido diso. Osoloso Yesuye o howo mapoo makawo pakanuloso, yayo odoó egeeyo howo mapoo sigoloso, Yesuye yimapoo egeesee takaso, "No epedee bi susuga ogolo?"

<sup>24</sup> Esemé odoó yayo peegoo ogogolone egeesee takaso, "O olo ogoso, esino odoó silesibono medee koo ogó, diba homo masi silesibo," diso.

<sup>25</sup> Esemé Yesuye o deeso see odoó howo bakadio si eyo howo mapoo sigeme, olo epedee omapoo o howo tekepo poloso bi ogogolone egeesee takaso,



“Bi susuga medee ogo,” diso. <sup>26</sup> Yesu odoo howo bakadio si tekepo moodooloso, Yesuye yo tekepo moodoo odoo abo mapoo takelega pagalame, yo mosopoo diye dolone yimapoo takaso, “No duga mosobia kuloduga na di,” diso.

*Pitaye Yesuwo goo yiligepugu*  
(*Matiyu 16:13-20, Luka 9:18-21*)

<sup>27</sup> Yesu o hamamee dili odoo sabolo abaga mosobia koola Kasaliya Pilipi mi mapoo polone, eli domo dulone, Yesuye o hamamee dili odoo dimapoo woosaso, “Edebeeyo a odoo ogu deliyo?”

<sup>28</sup> Esemе diayo Yesu mapoo nei egeesee takaso, “Odoо aboso taka no Yonee odoo howo sauwidili odoo toloso hogado simi deliso, aboso taka no Ilaisa deliso, osoloso odoo aboso taka no daga hoogoo Godeeyo to tosili odoo deliso.”

<sup>29</sup> Yesuye dimapoo woosaso, “Niyo a odoo ogu deliyo?”

Esemе Pitaye nei egeesee takaso, “No Keliso, Godeeye hudi magoo oso.”

<sup>30</sup> Esemе Yesuye dimapoo to kitulugu sabolo egeesee takaso, “Odoо mapoo a Keliso Godeeye hudi magoo dee na takeeye!” diso.

*Yesu eyo talai taka*  
(*Matiyu 16:21-23, Luka 9:22*)

<sup>31</sup> Yesu o hamamee dili odoo eligi mimologolone egeesee takaso, “Odoо Holo, a dala toowa bei talaiso, osoloso Yu odoowo wiligi tebisa sabolo, tei moso wiligi tebisa sabolo, tei eligili wiligi tebisa sabolo oso a gowoolaiso. Osoloso edebeeyo a teli mapoo magalaiso, esino

beame bakadio hedepedi eyo kulodu hoga-bileiso.” <sup>32</sup> Yesuye goo hagee o hamamee dili odo dimapoo woola yilege pugume, Pitaye yo peegoo ido dilesa yimapoo takaso, “No egeesee na takee.”

<sup>33</sup> Esemme Yesu o hamamee dili odo dimapoo bidi puguloso bolone, Pita mapoo egeesee takaso, “Saiten masi, no amaga peegoo di! Nayo egee takoo edebeeyo goolee takoo Godeeye goolee goo koo takoo.” <sup>34</sup> Yesu o hamamee dili odo sabolo osoloso odo mooloogoodoo gili-madoloso, dimapoo egeesee takaso, “Edebeeyo ama hamamee dadalai gooleega, diba daga eyo goomoga goo susuga peegee. Osoloso eyo talai sabolo dala toowa talai sabolo goo medee moodoloso ama hamamee ka sibe. <sup>35</sup> Odo agayo o gie badeli goodogoloso medee tekepo badalame gooleega, yo gie badeli osugobalaiso. Esino yayo o su eyo goodegelega pogoloso, mo goo maga osoloso to tekepo eyo goo maga edebeeyo yo wolomaga, yo tei gie badeli agalaiso. <sup>36</sup> Esiga edebeeyo mi toowa hamapoo bi susuga egee molo o daga, osoloso o gie badeli osugobooga, bi susuga ogo yo pidileisomo? Haye. <sup>37</sup> Esino mi toowa hamapoo o gie badeli osugobooga, ogo biso gie badeli see ka talaiyo? Gie badeli see talame bi tenelai bi hee mauwe. <sup>38</sup> Esiga edebeeyo Godeebolo ebilega pogoloso, goo tokenee osee tomo silesibo epedee beame hamapoo, edebeeyo o tei too sabolo, osoloso mo to maga, edebeeyo yimapoo dala teneeyaga obulone, o tei too mada magooga, hamamee mo mayo kitulugu gadeepugu sabolo, osoloso o momaiye sabolo sibilesa, nei ayo yimapoo waki pileiso.”

## 9

<sup>1</sup> Yesuye dimapoo egeesee takaso, “Ayo nimapoo tei taka, odoo abo hamapoo hagee do, niba epedee talaime, esino daga malalo Godeeye wiligi doloso badalai beeamo goo kitulugu sabolo siboga agalaiso.”

*Yesu o su mudu opusomodi  
(Matiyu 17:1-8, Luka 9:28-36)*

<sup>2</sup> Osoloso beeamo 6 olo pogoloso, hamamee Yesuye Pita, Yemes, osoloso Yonee esee mubi hoo dokodoo odoo mauwe mapoo ido paladeeso. Mubi hoo dokodoo o hamamee dili odoo oso balagamolome Yesu o su mudu opusomo paso.

<sup>3</sup> Esemo egeino Yesu o dugo dia hohodi ka heliye amaga poni oso howo dooso. Esiga mi hamapoo odoo heeso dugo hapooga dugo heliye egesi molo agalaime. <sup>4</sup> Osoloso Ilaisa dio Moseseo dio galaga sibilesa Yesubolo to kemeleeso.

<sup>5</sup> Pitaye Yesu mapoo egeesee takaso, “Eligili odoo, iba hamapoo dabalai tekepo. Esiga iyo waseme bakadio hedepedi tegegalaiso, hee nee, hee Moseseeyo, osoloso hee Ilaisayo.” <sup>6</sup> Pitaye takalai kibiya gooleedele, diba obume.

<sup>7</sup> Esemo kolobo sibilesa, diba gidisooso. Osoloso kolobo maga toso egeesee takaso, “Hagee medee ayo gooma mo holo, esiga o to medee dui.”

<sup>8</sup> Esemo Pita, Yonee, osoloso Yemes to taka duloso egegeino, Moseseo dio Ilaisa dio mena, esino hedepe Yesu dibolo badoboome egeiso.

<sup>9</sup> Osoloso diba mubi dokodooga see kumoo moulone, Yesuye dimapoo kitulugu sabolo takaso, “Epedee niyo egei goo odoo hee mapoo na takee. Esino Odoo Holo, a toloso hogabia ogoloso,

hamamee odoo hee mapoo ka takee,” diso. <sup>10</sup> Esemе Yesuye to taka diayo wulo kookoodooso. Esino diayo Yesu toloso hogabia goo eyo bei disono nei woosa nei woosa demeleso.

<sup>11</sup> Osoloso diayo Yesu mapoo woosaso, “Bei kasimaga tei eligili odoo oso takolone, daga Ilaisa sibilesa, Keliso hamamee sibileigo dee ka take-liyo?”

<sup>12</sup> Esemе Yesuye to nei dimapoo egeesee takaso, “O, daga Ilaisa sibilesa eli medee moodoolaiso. Godeeyo to booka mapoo hogugu moloso, ‘Odoо Holo, a dala toowa talaiso, osoloso edebeeyo a gowoolaiso.’ <sup>13</sup> Esiga ayo nimapoo taka, Ilaisa yo olo simiso. Osoloso edebeeyo yo dala teneeso, bei Godeeyo to booka maga taka ee dodolone.”

*Yesuye giso holo bo holo pala moodoo  
(Matiyu 17:14-21)*

<sup>14</sup> Yesuye o hamamee dili odoo bakadio hede-pedi mubi dokodoo paladee sabolo, see kumoo meilesa egeino, Yesu o hamamee dili odoo abo tei eligili odoo sabolo agadiga molome egeiso. Esemе odoo susuga sibilesa mooloogoodooso. <sup>15</sup> Diba disono mooloogoodoloso balagameleeno, Yesu dimapoo simi ogoloso, dia howoogaso. Esemе diba Yesu mapoo goomoga sabolo hogugo diadeeso.

<sup>16</sup> Esemе Yesuye dimapoo woosaso, “Niba ogoo goo maga agadiga malala?” diso.

<sup>17</sup> Osoloso mooloogoodoo ee ma kuloduga odoo heeso egeesee takaso, “Eligili odoo, mo holo bo holo pala oso ibaya paga, nayo moodoolame ido simino, no hamapoo mena. <sup>18</sup> Esiga bo

holo yimapoo poologa, yo miyomoo homodobuloso, kakawa molone o mei wulo tekeliso, osoloso maga maga makawo tiobiliso. Esino nee hamamee dili odo dimapoo mo holo bo holo peegoo hasuso pigilame woosano, diayo bo holo peegoo hasuso pigile, bei diayo kitulugu tebilena.”

<sup>19</sup> Esemee Yesuye dimapoo egeese takaso, “Niba tei too mauwe odo. A beame sage kasolo badoga niyo amapoo tei ka talaiyo? Osoloso niyo amapoo tei koo toga, a nimapoo dia gowoo. Esino giso holo amapoo ido sibe,” diso.

<sup>20</sup> Esemee diayo giso holo Yesu mapoo ido simiso. Esino bo holo eyo Yesu egeme, giso holo yo bo holoso o kulodu degiga meleso miyomoo homodobiaso. Esemee maga mapoo makawo oudoo sabolo mi mapoo bidigamo siliso.

<sup>21</sup> Yesuye holopeyo oma mapoo egeese woosaso, “Goo hagee kobolone holope yimapoo ka mimooloogoo?”

Esemee holopeyo amameeye nei Yesu mapoo egeese takaso, “Yo pepoko mapoo mimooloogoo.

<sup>22</sup> Beame susuga bo holoso holope wolomalame yo dou mapoo toodo, osoloso howomoo huso demeleeso. Esiga no kitulugu tebia mologa, nayo iba sooloo dele, osoloso iba pidi,” diso.

<sup>23</sup> Esemee Yesuye yimapoo egeese takaso, “Nayo taka, ‘No kitulugu tebia daga iba pidi,’ diso. Esino edebeeyo amapoo tei toga, bi susuga haga kalawanee.”

<sup>24</sup> Osoloso holopeyo amameeye Yesu mapoo to neligi egeese takaso, “A namapoo tei tooso, esino nayo a pidi, mo tei too pepoko see toowa dee,” diso.

<sup>25</sup> Esemе odoo susuga Yesu mapoo saga mooloo-goodalame sibadee egeme, Yesuye bo holo mapoo neligi egeesee takaso, “No odoo mapoo dulu taba ibaya teneli. Esiga ayo namapoo to kitulugu sabolo ka taka, no epedee holope hageeyo kuloduga peegoo gasiboga, see holope hageeyo kulodu na gadi.”

<sup>26</sup> Osoloso bo holo gwa sabolo dia degiga meleso holope miyomoo togobuloso, yo peegoo gadiso. Esemе holope mi mapoo degigilega kakawoloso meleeso. Esemе odoo aboso yo olo ta gooleeso.

<sup>27</sup> Esino Yesuye holopeyo dee mapoo toloso, yo tabalame pidiso. Esemе holope yo tabaso.

<sup>28</sup> Osoloso Yesu o hamamee dili odoo sabolo dibusomo moso kulodu dopolone, diayo Yesu mapoo mada woosaso, “Bei kasimaga bo holo peegoo hasuso pigilei kitulugu imapoo mauwe ka molosomo?”

<sup>29</sup> Esemе Yesuye to nei egeesee takaso, “Niyo daga dokodoo toodagooga, bo holo egesi masi peegoo ka hasuso pigiya.” diso.

*Yesu eyo talai goo see taka  
(Matiyu 17:22-23, Luka 9:44-45)*

<sup>30</sup> Yesu o hamamee dili odoo sabolo mi hee egee pogoloso, see Gelili mi ee ma kuloduga diso. Osoloso Yesu yo goomogele odoo heeso yo egeyaga, <sup>31</sup> bei, Yesu o hamamee dili odoo eligi meleeso. Yayo dimapoo egeesee takaso, “Odoо Holo, a amapoo ha teli odoo mapoo tenelame tiasalaiso. Osoloso diayo a wolomalaiso, esino beame bakadio hedepedi eyo kulodu ta maga a see hogabileiso.” <sup>32</sup> Esino diayo Yesuye taka to eyo

bei medee kibiya gooleedele. Esemе diba obume Yesu mapoo to eyo bei see wosele.

*Odoo agayo wiligi doloso ka badalaiyo?  
(Matiyu 18:1-5, Luka 9:46-48)*

<sup>33</sup> Yesu o hamamee dili odoo sabolo Kapeniyum mi mapoo peledabaso. Osoloso diba moso diso dabalai mapoo debeiso. Osoloso Yesu o hamamee dili odoo mapoo woosaso, “Niba eli domo abaga sibulone ogoo goo boowomo simiyo?” <sup>34</sup> Esino diayo to nei wedi dile, bei, diayo dibada kulodu odoo agayo wiligi doloso badalai goo maga to boowaso.

<sup>35</sup> Yesu yo biamolone o hamamee dili odoo gili-madoloso, dimapoo egeesee takaso, “Edebeeyo malalo wiligi doloso badalai gooleega, yo eyo pepookodee, osoloso odoo susuga wulo wulayo pidi.”

<sup>36</sup> Yesuye holope ido sibilesa, dibada mudugiyo tebidiso. Osoloso holope Yesuye maduloso dimapoo egeesee takaso, <sup>37</sup> “Edebeeyo mo hu maga holope hageesi pidiga, yo a pidi masi pidiso. Osoloso edebeeyo a pidiga, yo moma a diye di pidi masi pidiso.”

*Odoo imapoo ha koo teli, diba ibada odoo  
(Luka 9:49-50)*

<sup>38</sup> Yoneeye Yesu mapoo egeesee takaso, “Eligili odoo, iyo odoo hee nee hu maga bo holo peegoo hasisamo silime egeiso. Esemе koodobilame iyo yimapoo takaso, bei yo ibolo hodobo mooloo-goodoo hedepenee.”

<sup>39</sup> Eseme Yesuye egeesee takaso, “Na hamaga takee. Odoos heeso mo hu maga goo mudu opusomodi moodooga, yayo mo hu mapoo tokenee goo saga takalaime. <sup>40</sup> Osoloso odoos imapoo ha koo teli, diba ibada odoos.” <sup>41</sup> Yesuye egeesee takaso, “Ayo nimapoo tei goo hee taka, bei niba Kelisowo odooga, odoos heeso nimapoo howo keeneega, yo hamamee Godeeye nei tenelaiso.”

*Tokenee goo talame kukuli*  
(*Matiyu 18:6-9, Luka 17:1-2*)

<sup>42</sup> Eseme Yesuye o hamamee dili odoos dimapoo egeesee takaso, “Odoos heeso amapoo tei too odoos tokenee mapoo gido dilame gooleega, daga odoos aboso yimapoo sibilesos, diayos o mu mapoo yo toowa bagagolosos howo bou mapoo toosoga, odoos egee dala pepokos tololos talaisos. Esino odoos yayo amapoo tei too pepokos odoos ee tokenee mapoo gido dilesos, tokenee togas, edebeyos tokenee mapoo gido dili odoos ee takelegas poogoogas, Godeeye yimapoo nei dala toowa tenelaisos. <sup>43</sup> Osolosos nee dees hodies osos no tokenee mapoo gido dugas, dees hodies egee kobigis, dees hediliwesos badobosos kookaiyos gies badelis talaisos soowas. Osolosos nee dees bakadios sabolos dou mapoo dileis tekeponees, bei dou egee koo semilis. <sup>44</sup> \* <sup>45</sup> Osolosos nee homos hodies osos no tokenee mapoo gido dugas, homos hodies egee kobigis, homos hediliwesos badobosos kookaiyos gies badelis talaisos soowas. Osolosos nee homos bakadios sabolos dou mapoo dileis tekeponees. <sup>47</sup> Osolosos nee howos hodies osos no tokenee mapoo gido dugas, nee howos

---

\* **9:44:** 9:44 sabolos 9:46 sabolos Makaye hamapoo hogugule. Esino 48 maga taka to hedepe.



hodio egee tapigi. Godeeye wiligi doloso badeli omapoo howo hediliwe gadilei soowa. Esino howo bakadio sabolo dou mapoo toodalai tekeponee. <sup>48</sup> Bei mi omapoo ‘boobee egee molo koo wedili osoloso dou koo semili.’

<sup>49</sup> Esiga odoo susuga dala toga douso gawe masi gawoolaiso, bei Godeeye goomoga iba medee tekepo dabalame.”

<sup>50</sup> “Solu hadali bi medee tekepo. Esino solu hadali mauwe poogooga, hadali see talaisomo? Haye, see talaime. Esiga niba solu masi molone nemegei dimapoo mesie sabolo deebie.”

## 10

### *Sobo huloso pegeli goo* (*Matiyu 19:1-12, Luka 16:18*)

<sup>1</sup> Yesu o hamamee dili odoo sabolo Kapeniyum mi pogoloso abaga dino Yudiya mi mapoo peledoboloso, see abaga dino Yoden howo daso. Osoloso omapoo egeino, odoo mooloogoodoo yimapoo sibadeeme, Yesuye dimapoo Godeeyo goo eyo daga eligi egeesee eligiso.

<sup>2</sup> Osoloso Pelisi odoo aboso sibilesa Yesuye to tokenee takabeleeso, kukulo agalame yimapoo woosaso, “Esiga gisoso sobo huloso pagalai soowayo?”

<sup>3</sup> Esemee Yesuye dimapoo to nei egeesee takaso, “Sobo huloso pegeli eyo goo Moseseeye nimapoo tei kasee eligiliyo?” diso.

<sup>4</sup> Esemee diayo egeesee takaso, “Moseseeye imapoo tei egeesee eligiso, gisoso sobo poogooga,

daga sobo pegeli peipa omapoo hoguloso sobo yo ka peegeena.”

<sup>5</sup> Esino Yesuye dimapoo to nei egeesee takaso, “Mosese yayo nimapoo egeino nibada sooloo dia kalawa neme tei hagee ka magoo. <sup>6</sup> Godeeye mipoo toowa hagee daga moodoo mapoo, giso sabolo sobo sabolo moodooso. <sup>7</sup> Bei egeesi maga gisoso oma dio owee dio pogoloso, see o sobo sabolo hedepe doloso dabalaiso. <sup>8</sup> Osoloso diba daga giso obusomo, sobo obusomo doloso badebeiso. Esino diba see olo hedepe doloso doso.” <sup>9</sup> Yesuye egeesee takaso, “Godeeye giso dio sobo dio hedepedi, domo na pi,” diso.

<sup>10</sup> Osoloso hamamee Yesu o hamamee dili odoo sabolo moso kulodu dopolone, sobo huloso pegeli eyo goo diayo Yesu mapoo see woosaso. <sup>11</sup> Esemee Yesuye dimapoo egeesee takaso, “Edebeeyo o sobo pogoloso, sobo hee huga, yo odoo heeyo sobo peedee huso. <sup>12</sup> Osoloso sobo yo omo pogoloso giso hee huga, yo odoo heeyo giso peedee huso.”

*Yesu sabolo holaiso sabolo  
(Matiyu 19:13-15, Luka 18:15-17)*

<sup>13</sup> Beame hedepeso odoo aboso holaiso Yesu mapoo ido sibadeeso, o deeso sigoloso diba pidilame. Esino o hamamee dili odoo oso goo egee ogoloso hamaga takaso. <sup>14</sup> Osoloso Yesuye o hamamee dili odoo oso holaiso hamaga taka ogoloso, kamana sabolo dimapoo takaso, “Holaiso amapoo sibilei soowa. Niyo na hamaga takee, bei odoo holaiso hageesi masi oso Godeeye wiligi doloso badeli mapoo gasibileiso. <sup>15</sup> Ayo nimapoo tei goo hee taka, edebeeyo o goo holaiso

masi omamo to mapoo mesimo sili, egeesi pel-ega pogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe.”<sup>16</sup> Osoloso Yesuye holaiso gilimadoloso, yayo hedepe maduloso o deeso sigolone Godeeye no pidi dee takoo, hedepe maduloso o deeso sigolone Godeeye no pidi dee takoo, diso.

*Bi bei odoo*

*(Matiyu 19:16-30, Luka 18:18-30)*

<sup>17</sup> Yesu o hamamee dili odoo sabolo mi hee mapoo dimeleeno, odoo hee hoguo sibilesa, o homo beiyopoo gauwoloso, yimapoo egeesee takaso, “Eligili odoo tekepo, ayo ogoogo toga badoboso kookaiyo gie badeli ka talaiyo?”

<sup>18</sup> Esemé Yesu yo Godeeye hudi magoo doloso gooleedalame, yayo nei egeesee takaso, “Bei kasalame nayo a tekepo ka sisala? Hedepe Godeeno medee tekepo. <sup>19</sup> Esino nayo woosa to eyo nei, Godeeyo tei magoo no olo gooleedooso: odoo na wolome, adaba kooka sobo na peedee hui, heli na te, odoo hee mapoo gamenee na gigidi, odoo hee mapoo gamenee goo maga heli na te, osoloso nama dio noowee dio to taka mapoo mesie.”

<sup>20</sup> Osoloso odoo yayo Yesu mapoo egeesee takaso, “Eligili odoo, a holope maga simi tei susuga hagee ayo tobuloso tomo simiso.”

<sup>21</sup> Esemé Yesu sooloo dala sabolo odoo omapoo bolone yimapoo egeesee takaso, “No goo hedepe doopoo dagadi moloso. No dileso, nee bi susuga odoo abo mapoo nei moleeso talame todi. Osoloso bi too eyo nei molee bi mauwe odoo mapoo

pi. Eseega no kei mi mapoo nei tenelaiso. Osoloso no ayo di hamamee sibe,” diso.

<sup>22</sup> Osoloso bi bei odoo yo Yesuye to taka duloso, pupuda sabolo diso, bei bi bei mologa, o bi odoo abo mapoo tenelai goomogele.

<sup>23</sup> Eseme bi bei odoo dime, Yesu o hamamee dili odoo mapoo bolone egeesee takaso, “Bi bei odoo oso Godeeye wiligi doloso badeli mapoo gasibilei kalawa toowa.”

<sup>24</sup> Yesuye to taka duloso diba howoogaso. Esino Yesuye see dimapoo takaso, “Mo holo dio, Godeeye wiligi doloso badeli mapoo gasibilei kalawa toowa. <sup>25</sup> Esiga dugo duseli midole ou maga be toowa, kemol oso gadilei kalawa. Esino bi bei odoo oso Godeeye wiligi doloso badeli mapoo gasibilei kalawa toowa.”

<sup>26</sup> O hamamee dili odoo Yesuye to taka duloso dia howoogaso. Osoloso disono nei woosa nei woosa dolone egeesee takaso, “Odo agayo gie badeli ka talaisomo?”

<sup>27</sup> Eseme Yesuye dimapoo bolone to nei takaso, “Edebeeyo eyo kitulugu maga Godeeye wiligi doloso badeli mapoo gasibileime, esino Godeeyo kitulugu sabolo bi susuga kalawanee.”

<sup>28</sup> Osoloso Pitaye Yesu mapoo egeesee takaso, “No ege, iba bi susuga poogooso, nayo di hamamee sibilame.”

<sup>29</sup> Esino Yesuye egeesee takaso, “Ayo nimapoo goo hee toowa taka, edebeeyo ayo di hamamee sibilame, osoloso to tekepo eyo goo maga, o moso, o emei, o omoo, o omolo, o owee, o ama, o holaiso, osoloso mi poogooga, <sup>30</sup> odoo yayo o bi susuga poogoo eyo nei toowa daga dileso talaiso.

Osoloso yo mi toowa hamapoo badolone, see moso, emei, omoo, omolo, owee, holaiso, osoloso mi bei malaiso. Osoloso edebeeयो yimapoo dala tenelaiso, bei yayo mo to mapoo mesiliga. Esino yo mo to tekepo eyo goo maga dala tolosa, mi hoo poogoo mapoo see Godeeyo mi siboga, yo bado-boso kookaiyo gie badeli talaiso. <sup>31</sup> Esiga epedee hamapoo odoo malalo egee do, see hamamee dabalaiso. Osoloso hamamee egee doso, see malalo dabalaiso.”

*Yesu eyo talai see tobu taka  
(Matiyu 20:17-19, Luka 18:31-34)*

<sup>32</sup> Yesu o hamamee dili odoo sabolo Yoluselem mi mapoo dulone, Yesuye malaso. Esino o hamamee dili odoo goo howoogamo dime, odoo abo hamamee sibadee dia ebigaso. Bei odoo susuga oso goolee Yoluselem mapoo goo tokenee peledeebeeyaga. Osoloso Yesu o hamamee dili odoowe gilimadoloso peegoo dopolone, Yoluselem mapoo goo yimapoo peledabalai dimapoo takaso. <sup>33</sup> Yesuye dimapoo egeese takaso, “Iba Yoluselem mapoo peledobooga, Odo Holo, a edebeeयो tei moso wiligi tebisa sabolo, tei eligili odoo abo mapoo tenelaiso. Osoloso amapoo midileiso, osoloso a teli mapoo magalaiso, osoloso Yu odoonee mapoo tenelaiso. <sup>34</sup> Diayo a manalaiso, osoloso amapoo makawo pakalaiso, osoloso a tiso dupalaiso, osoloso a wolomalaiso. Esino beame bakadio hedepedi pogoloso hamamee ta maga see hogado sibileiso.”

*Yemes dio Yonee dio goomoga goo Yesu mapoo ogo taka*

*(Matiyu 20:20-28)*

<sup>35</sup> Osoloso Sebediyo owolo Yemes dio Yonee dio Yesu mapoo sibilesi egeese takaso, “Eligili odoo, goo iyo goomoga namapoo taka,” diso.

<sup>36</sup> Esem Yesuye nei takaso, “Ogoo goowo?”

<sup>37</sup> Esem diayo nei egeese takaso, “Nama Godeeye wiligi doloso badeli mi toowa mapoo siboga, iba goomogo, odoo hee nee dee deede dokolo buo, osoloso dee dobusu dokolo buo doloso goo susuga nobolo wiligi dalame,” diso.

<sup>38</sup> Esino Yesuye dimapoo nei egeese takaso, “Niyo egee takoo goo eyo bei niba gooleede. Esiga niba dala toowa ayo talame egee molo, niba dala egeese talai soowayo? Osoloso niba ayo talame egee molo niba egeese talai soowado?”

<sup>39</sup> Esem diayo nei egeese takaso, “O, iba dala egee talai goomogo.”

Esem Yesuye see egeese takaso, “Niba dala toowa ayo talame egee molo, niba dala egeese talaiso. Osoloso ayo talame egee molo, niba egeese talaiso. <sup>40</sup> Esino odoo hee mo dee deede dokolo buo, mo dee dobusu dokolo buo dalai, ayo hudi magalame, bei debi omapoo bilei Godeeye olo hudi magooso.”

<sup>41</sup> Osoloso Yesu o hamamee dili odoo abo 10 diayo Yemes dio Yonee dio to taka duloso, dimapoo dia kamaso. <sup>42</sup> Yesu o hamamee dili odoo gilimadoloso, dimapoo egeese takaso, “Mipoo toowa hageeyo wiligi odoo tebisa diayo odoo abo dibada hemi egee do mapoo dala sabolo, hegi sabolo teniliso. <sup>43</sup> Esiga niba mipoo toowa

hageeyo wiligi odoos tebisa dia goos na peedee. Esino odoos agayo malalo badalai goomogoga, nibada kulodu odoos hee dia pidi. <sup>44</sup> Osoloso odoos agayo see malalo badalai dia goomogoga, no odoos susuga wulo nei mauwe wulayo dia pidi. <sup>45</sup> Esiga Odoos Holo, a mi hamapoo edebeeyo a pidilame ka sibile, esino ayo mi odoos pidilame ka simi. Osoloso mipoo toowa hamapoo odoos bei Godee mapoo iyado sibilame a talame ka simi.”

*Yesuye odoos howo bakadio si moodoo  
(Matiyu 20:29-34, Luka 18:35-43)*

<sup>46</sup> Osoloso diba Yeliko mi mapoo peledoboloso, Yesu o hamamee dili odoos sabolo mi egee pogoloso dimeleeno, odoos mooloogoodoo susuga diayo di hamamee simiso. Esemee odoos howo bakadio si o hu Batimeyes, Timayes eyo owolo, Yesuye sibilei eli pee mapoo badolone molee howameleeso. <sup>47</sup> Esiga Batimeyesye Yesu Nasalet odoos sibogodi dume, Yesu mapoo idagaso, “Yesu, Debidiyo amawe, nayo a sooloo dele, osoloso pidi!”

<sup>48</sup> Batimeyes Yesu mapoo idageme, odoos aboso yo hamaga takaso. Esino yo koodobilega, see dia neligidi idagaso, “Debidiyo amawe, nayo a sooloo dele, osoloso pidi!”

<sup>49</sup> Yesu Batimeyes yayo i duloso, kookoo tabaso, osoloso egeesee takaso, “Yo hapoo sibe dee takee.” Esemee diayo howo bakadio si odoos iso, osoloso yimapoo egeesee takaso, “Goomoge. No toboloso, di. Yesuye no i,” diso. <sup>50</sup> Esemee Batimeyes o gidei togobuloso, saga dokodoo pupeleso, Yesu mapoo simiso.

51 Yesuye yimapoo egeesee takaso, “Ayo namapoo kasee moodoolameyo?”

Eseme howo bakadio si odoo oso nei egeesee takaso, “Eligili odoo, a agalai goomogo.”

52 Eseme Yesuye yimapoo egeesee takaso, “No wulo di. Nee tei too oso no tekepo paso.” Eseme howo bakadio si odoo yo epedee omapoo see medee egeiso, osoloso yo Yesubolo eli maga diso.

## 11

*Yesuye Yoluselem mi mapoo wiligi odoo masi toboloso gadi*

*(Matiyu 21:1-11, Luka 19:28-40, Yonee 12:12-19)*

<sup>1-2</sup> Yesu o hamamee dili odoo sabolo simi Yoluselem mi koola topome, Olipi mubi halege mapoo mosobia bakadio, Betepage osoloso Betani mapoo peledabaso. Osoloso Yesuye o hamamee dili odoo bakadio diye doloso dimapoo egeesee takaso, “Mosobia koogee mapoo dilesa, omapoo ogoga be hu giekauwa, o hu donki, edebeeyo miligi mapoo buloso koo dili, mu mapoo ebigiso bagagoloso, homo mapoo bagagoo moloso. Esiga niyo ebigi pidi pogoloso, hapoo hado sibe. <sup>3</sup> Odoo heeso niba ogo toowala dee takooga, niyo wulo egeesee takee, ‘Donki be hagee epedee Lodeeye goomogogona, osoloso see hamamee odoo heeso ka hado sibileigo,’ dee takeeye,” diso.

<sup>4</sup> Yesu o hamamee dili odoo bakadio mosobia omapoo dilesa, donki be moso peegoo ebigi bagagoloso eli palaga tobudume egeiso. <sup>5</sup> Eseme diayo donki be ebigi bagagoo pidi meleeno, odoo



abo omapoo debei oso dimapoo egeesee takaso, “Niyo ogo talame donki be ebigi bagadoo egee ka pidala?” <sup>6</sup> Esemé Yesu o hamamee dili odoó oso to nei Yesuye dimapoo takee doloso taka tobuloso egeesee takaso. Esemé odoó abo oso donki be hado dilei soowa diso. <sup>7</sup> Esemé diayo donki be Yesu mapoo hado sibume, o miligi mapoo dugo pooloso, Yesu dokodoo buloso diso. <sup>8</sup> Osoloso odoó mooloogoodoo susuga Yesu mapoo goomogolone dia gidei oso eli Yesuye dilei mapoo malalo palagamo dime, odoó aboso woiyo dibada go mapoo segei kookooloso palagamo diso. <sup>9</sup> Yesu yo domo abaga sibume, odoó malalo debei sabolo osoloso Yesuwo miligiyo abaga sibadee odoó oso idegisilone, egeesee takaso,

“Inolome! Iba Godee mapoo goomogo!

Odoó Godeeyo hu maga kitulugu sabolo sibo yo Godeeye pidi!

<sup>10</sup> Wiligi doloso badeli mi ee sibo Godeeye pidi. Hagee ibada amawe Debidiye wiligi doloso badebei mi egesi masi malaiso.

Osoloso iba kei mi ma dokodoo Godee mapoo goomogo!”

<sup>11</sup> Osoloso Yesu o hamamee dili odoó sabolo Yoluselem mapoo sibilesó, Yesu Godeeyo tei moso kulodu gadiso. Yo moso kulodu bi susuga mapoo egegemeleso diso, bei olo neligime, osoloso o hamamee dili odoó <sup>12</sup> sabolo Betani mi mapoo diadeeso.

*Yesuye pigi homo mapoo to taka  
(Matiyu 21:18-19)*

<sup>12</sup> Yesu Betani mapoo tialoso, gesikolo Yoluselem mapoo dimeleeno, eli domopoo yo dia hodiaso. <sup>13</sup> Esemé Yesu eli sage abaga sibulone, pigi homo du egeiso. Esemé ko pameleyaga hodu dileso, egeiso. Esino ko mauwe, hedepe duwenabu, bei pigi ko peli eyo beeamenee. <sup>14</sup> Yesuye pigi homo mapoo egeese takaso, “No hamamee homokoko see palaimé!” Yesuye egeese taka, o hamamee dili odo duso.

*Yesuye Godeeyo tei moso kuloduga odo peegoo hasusopugu*

*(Matiyu 21:12-17, Luka 19:45-48, Yonee 2:13-22)*

<sup>15</sup> Yesu o hamamee dili odo sabolo Yoluselem mapoo peledoboloso, Yesu Godeeyo tei moso tegei kulodu gadilesó egeino, odo bi abo nei moleeso talame si sabolo, osoloso odo bi abo nei moleeso talaga molome egeiso. Osoloso molee mudu opusomodi piligeli debi poba sabolo molo talame poba sabolo bidige puguloso, diba susuga peegoo hasuso puguso. <sup>16</sup> Odo susuga bi toloso Godeeyo tei moso tegei eli pee kuloduga gadiyaga Yesuye hamaga takaso. <sup>17</sup> Yayo dimapoo eligilone egeese takaso, “Godeeyo booka ma kulodu toso egeese takoo, ‘Mo tei moso odo mosobia susuga maga oso Godee mapoo todagili moso.’ Esino niyo goo egesi tolone, adaba molee heli teliso. Esiga niyo mo moso hagee see heli teli moso paso.”

<sup>18</sup> Esemé tei moso wiligi tebisa sabolo tei eligili odo susuga sabolo oso to hagee dume, diayo Yesu wolomalame eli esigamo silesibiso.

Bei Yesu mapoo kooso, bei diayo eligi mapoo odoosusuga tei telega peegeeyaga, osoloso odoosusuga Yesuye eligi dume howoogaso osoloso goomogaso.

<sup>19</sup> Osoloso habe omapoo Yesu o hamamee dili odoosabolo mi toowa egee pogoloso diadeeso.

*Pigi homo oso sia goo*  
(*Matiyu 21:20-22*)

<sup>20</sup> Gesikolodee mapoo diba eli domopoo diadeega meleeno, diayo pigi homo egeiso. Pigi homo o dee sabolo o kou sabolo, osoloso too susuga sio doloso molome egeiso. <sup>21</sup> Pita Yesuye daga homo mapoo to taka goolee puguloso Yesu mapoo egeesee takaso, “Eligili odoos, no ege. Nayo daga pigi homo mapoo to taka oso olo sio doloso molo,” diso.

<sup>22</sup> Esemes Yesuye o hamamee dili odoos dimapoo egeesee takaso, “Niba Godee mapoo tei te,” diso.

<sup>23</sup> “Ayo nimapoo goo hee toowa taka, edebeeyo mubi hamapoo egeesee takooga, ‘No dilesos, abei mapoo kulodu mei,’ dees takooga, o sooloo ma kulodu googoolee bakadio delega, yayo taka goo oso tei peledabalai dees gooleega, Godeeye goo hagee tei peledabalame modolaiso. <sup>24</sup> Esiga ayo nimapoo taka, niyo toodaga goo oso ogoos bi talame ka toodagoosomo, bi egee talai doloso tei toga, bi egee niyo talaiso. <sup>25</sup> Esiga niyo howo gisee goo toodagolone, odoos heeso nimapoo goo tokeen moodoo pepoko mologa, niyo odoos egeeyo goo tokenee daga malalo boobado pigi. Egeeseega

nibada oma keimi ma dokodoo egee bado, Godeeye nibada goo tokenee hapoloso boobado pigileiso. <sup>26</sup> Niyo odoos heeyo goo tokenee boobadel-ega poogooga, nibada oma keimi ma dokodoo egee bado Godeeye nibada goo tokenee hapoloso boobadalaime.”\*

*Yesuye kitulugu maga woosa goo  
(Matiyu 21:23-27, Luka 20:1-8)*

<sup>27-28</sup> Diba see Yoluselem mapoo sibadeeso, osoloso Yesu tei moso ma kulodu silino, tei moso wiligi tebisa odoos sabolo, tei eligili odoos sabolo, Yu odoowo wiligi tebisa odoos sabolo oso, yimapoo sibilesos woosaso, “No kitulugu kamaga tolosos goo susuga egee ka moodoomo silala? Nayo goo susuga hagee moodoolame kitulugu namapoo odoos agayo teneeyo?”

<sup>29</sup> Esemes Yesuye dimapoo nei takaso, “Ayo nimapoo wosolaisos. Osoloso niyo amapoo nei takooga, ayo goo susuga hagee moodoolame amapoo kitulugu tenees hagees odoos ee nimapoo takalaisos.” <sup>30</sup> Esemes Yesuye dimapoo woosaso, “Yoneeyes odoos susuga howo sauwidigas goo eyo bei kasiyo, kitulugu Godees magas simiyo, o odoos hees magas simiyo? Niyo amapoo to nei takee!” diso.

<sup>31</sup> Esemes diso nediliyo to moumelesos takaso, “Iyo Godees magas simi dees takooga, yayo imapoo egeesees takalaisos, ‘Bei kasimagas niyo Yonees mapoo tei telegas ka poogoowo?’ dees takalaisos.

<sup>32</sup> Esinos iyos yayos kitulugos egees odoos magas simi

---

\* **11:26:** 11:26 To hagees odoos abos osos takas Magayes hogugus dees takelisos, esinos odoos beis osos takas Magayes hogugules dees takelisos.

dee takooga, odoosusuga oso imapoo kamana-galaiso.” Bei odoosusuga oso goolee Yonee yo tei Godeeyo to tosili odoosusuga deegweli.

<sup>33</sup> Esemediayo Yesu mapoo to nei egeesee takaso, “Iba gooleedelee,” diso.

Esemesyesu ye dimapoo to nei takaso, “Ayo kitulugu too gooye bei nimapoo takalaime,” diso.

## 12

*Geleipi ko segei homolee sabolo bali odoosabolo*

*(Matiyu 21:33-46, Luka 20:9-19)*

<sup>1</sup> Yesu ye see dio masi takolone tei moso wiligi tebisa odoosabolo, tei eligili odoosabolo, Yu odoowo wiligi tebisa odoosabolo dimapoo takaso, “Beeame hee mapoo odoosabolo heeso geleipi ko sogoloso pee maga beeleso. Osoloso geleipi ko i debisilame yo ou poogooso. Osoloso yo bi egee balame moso egi dogo yo ou poogoo mapoo tobuduga tegeiso. Osoloso yo eli sage peegoo dilame, geleipi ko segei ee balame odoosabolo abo gilimadoloso dimapoo egeesee takaso, “Niba geleipi ko segei hagee niyo medee balaga melee. Osoloso geleipi ko peleso, ko poga, ko hodio abo niyo gooloogolone, ko hodio abo mo gooloogaloso, magoo deemelee,” diso. Osoloso geleipi ko segeli odoosabolo yo mi hee mapoo diso. <sup>2</sup> Osoloso yo omapoo dileso badoboome, geleipi ko oso peleso palagaloso bi moodoogaloso gooloogalai beeame oso simiso. Esemeyayo o tou teli odoosabolo hee diye dolone geleipi ko abo gooloogaloso tosibe diso. Esemesabolo o tou teli odoosabolo oso geleipi ko segei

ee bali odoos dimapoo o wiligi odoos toba eyo geleipi ko abo gologaloso tosilame diso. <sup>3</sup> Esino yo omapoo dileso peledobome bali odoos oso yo woomele pogoloso geleipi ko telega mosoowe see wedi diye diso. <sup>4</sup> Esemee egeesee si ogoloso, geleipi ko segeli odoos yayo see o tou teli odoos hee diye diso. Esino odoos hee yibolo see geleipi ko segei bali odoos oso wiligi mapoo woloso, ebia goo teneloso diso. <sup>5</sup> Esemee geleipi ko segeli odoos yayo o tou teli odoos hee diye diso. Esino geleipi ko segei ee bali odoos oso yo wolomaso. Esemee geleipi ko segeli odoos yayo o tou teli odoos abo susuga diye diso. Esino geleipi ko segei ee bali odoos oso abo wulo wooloso poogooso, esino abo diayo piluguso.

<sup>6</sup> Esino yayo gooma owolo hedepe diye dolone egeesee gooleeso, “Geleipi ko segei ee bali odoos oso mo holowo to duloso, yimapoo mesileiso,” diso.

<sup>7</sup> Esino geleipi ko segei ee bali odoos diayo geleipi ko segeli odoos eyo owoloye simi ogoloso diso nediliyo egeesee takaso, ‘Holo hagoso amaye geleipi ko segei hagee oma toga yayo talaiso. Esiaga geleipi ko segei hagee see iyo talame yo wolomamo,’ diso. <sup>8</sup> Esemee diayo geleipi ko segeli odoos owolo tolosa wolomaso. Osoloso o su geleipi ko sogoloso beelee peegoo tokopuguso.”

<sup>9</sup> Yesuye dio masi hagee takoloso badolone egeesee takaso, “Esiaga geleipi ko segeli odoos yayo see kasealaisomo? Yayo sibilesa geleipi ko segei bali odoos piliguloso, see geleipi ko segei bali odoos abo mapoo ‘gibe’, dee takalaiso. <sup>10</sup> Esiaga niba

Godeeyo to booka ma kulodu hogugu to hagee see niyo hesigaso,

‘Moso tegeli odoos diayo omou gowoome poogoo, omou oso epedee hamapoo moso omu domo pupodoo ka moloso. <sup>11</sup> Goo hagee Godeeye moodoo. Esiga iba goo hagee ogoloso goomogoso.’”

<sup>12</sup> Esem Yu odoos wiligi tebisa diayo Yesuye dio masi taka hagee dume egeesee gooloogaso, “Yesuye ibada goo takoo,” diso. Esem diayo Yesu talame eli esigamo silesibiso. Esino diba odoos susuga bolo obugume Yesu telega poogoo diadeeso.

*Sisa mapoo tekisi molee teneli goo*  
(*Matiyu 22:15-22, Luka 20:20-26*)

<sup>13</sup> Osoloso hamamee Yu odoos wiligi tebisa oso Yesuye Loum gamalee mapoo goo tokenee abo takalame gooleeso. Esem diayo Pelisi odoos abo sabolo Helodeeyo mooloogoodoo odoos abo sabolo Yesu mapoo gamenee takalame diye diso.

<sup>14</sup> Diayo yimapoo sibilesos egeesee takaso, “Eligili odoos, iba gooleedoos, no tei goo takeli odoos. Osoloso no odoos bolo koo ebili, osoloso nayo odoos kolo mapoo koo egeli. Osoloso nayo Godeeyo eli odoos susuga mapoo tei eligi moloso. Esiga Loum gamalee wiligi odoos Sisa mapoo tekisi molee tenelai tekepows o tokeneeyo? <sup>15</sup> Iyo tenelaisomo o tenelaimayo?” diayo Yesu mapoo woosaso.

Esem Yesu yo diayo gamenee takalame si gooleedolosos dimapoo egeesee takaso, “Bei kasimaga niyo a ka kukulo ogoowala? Niba molee ko hedepe a agalaiya tosibe,” diso.

<sup>16</sup> Eseme diayo Yesu mapoo molee ko hedepe tosibilesa teneme, yayo dimapoo takaso, “Hagee odo agamo mudu do osoloso agamo hu do?”

Eseme diayo yimapoo nei takaso, “Sisayo mudu sabolo hu sabolo molo,” diso.

<sup>17</sup> Eseme Yesuye dimapoo takaso, “Sisayo bi Sisa mapoo tenee. Osoloso Godeeyo bi Godee mapoo tenee,” diso.

Eseme diayo Yesuye taka dume dia howoogaso.

*Toloso see hogabili eyo goo Yesu mapoo woosa (Matiyu 22:23-33, Luka 20:27-40)*

<sup>18</sup> Osoloso midoo ma kuloduga hogoogabili goo mauwe dee takeli, Sedisi odo, diayo Yesu ma sibilesa gamenee takalame egeese woosaso, <sup>19</sup> “Eligili odo, Moseseeye imapoo tei eligilone egeese eligiso, gisoso sobo huloso holo soomagelega toga, see omoloye emei ta eyo osobo bau huloso emeiyo hu maga holo sologamagalaiso. <sup>20</sup> Omolo dio 7 debeiso. Esino daga emeiye sobo huloso holo soomagelega taso.

<sup>21</sup> Osoloso omoloye emei ta eyo osobo bau huso, esino holo soomagelega taso. Osoloso omolo hee domo oso bau see huloso, holo soomagelega taso.

<sup>22</sup> Egeese seemeleso omolo dio susuga 7 holo soolooga magelega weidaso, osoloso sobo bau sabolo taso. <sup>23</sup> Bei sobo yo giso 7 oso huyaga, toloso hogabilei beame omapoo, yo agamo sobo dalaisomo?”

<sup>24</sup> Yesuye dimapoo nei takaso, “Niba goo doopoo gweli odo, bei niba Godeeyo to oso booka maga taka sabolo Godeeyo kitulugu sabolo niba gooledele. <sup>25</sup> Bei toloso hogabilei beame



omapoo giso sabolo sobo sabolo huleime. Esino diba keimi ma dokodoo Godeeyo momaiye masi dabalaiso. <sup>26</sup> Toloso hogabilei goo, niba Mosese-eye booka mapoo hogugu niyo hesigileyo? Ebelehem, Aisek, osoloso Yekob olo taso. Esino homo douso nademe, paiya beeame omapoo Godeeye Mosese mapoo egeesee takaso, ‘Epedee hamapoo a Ebelehemyo Godee, osoloso a Aisekeeyo Godee, osoloso a Yekobyoy Godee,’ diso. Odoo hagee weidaso, esino dibada dio oso epedee hamapoo gie doso. <sup>27</sup> Esiga yo odoo weida eyo Godeenee, odoo gie hagee do eyo Godee. Esino niyo odoo tolosa see gie badeli talaima dee gooleega, niba goo doopoo gweli odooso.”

*Tei magoo kaso toowa ka molosomo?  
(Matiyu 22:34-40, Luka 10:25-28)*

<sup>28</sup> Tei eligili odoo hee diayo toso agadigamelee omapoo sibileso badolone dumeleeso. Osoloso Yesuye Sedisi odoo mapoo to nei tekepo taka dume, yayo Yesu mapoo egeesee woosaso, “Tei magoo kaso toowa ka molosomo?” diso.

<sup>29</sup> Esemu Yesuye nei takaso, “Tei magoo toowa hagoso, ‘Isalael (Yu) odoo niba dui! Ibada Lodee Godee hedepe. <sup>30</sup> Esiga nee Lodee nee Godee nee sooloo ma kulodu googolee sabolo, nee su susuga sabolo, osoloso nee kitulugu sabolo oso dia sooloo dele.’ <sup>31</sup> Osoloso tei magoo toowa hee hagoso: ‘Nee su no nediliyo egee sooloo dolo egeesee masi, nemegei nayo dia sooloo dele.’ Tei magoo toowa aboso, tei bakadio hagee dagadile,” diso.

<sup>32</sup> Osoloso tei eligili odoo yayo see Yesu mapoo nei takaso, “Eligili odoo, nayo tei goo olo takaso. Esiga Godee hedepe badoso, Godee hee mauwe.

<sup>33</sup> Esiga gala hu woloso siloso Godee mapoo teneli sabolo, bi abo teneli sabolo, tei oso taka hagee haga goo toowanee. Esino tei magoo bakadio hagoso goo toowa ka moloso: Nee sooloo ma kulodu googolee sabolo, nee su susuga sabolo, osoloso nee kitulugu sabolo oso, dia sooloo dele. Osoloso nee su no nediliyo egee sooloo dolo egeesee masi nemegei nayo dia sooloo dele,” diso.

<sup>34</sup> Esemee Yesu odoo yayo to nei tekepo taka dume yimapoo egeesee takaso, “No Godeeye wiligi doloso badeli mapoo gasibilei koola bado,” diso. Esemee odoo aboso goo abo yimapoo woosalai obume poogooso.

*Keliso agamo owolowo?*

*(Matiyu 22:41-46, Luka 20:41-44)*

<sup>35</sup> Hamamee Yesuye Yu odoowo tei moso tegei kulodu odoo susuga mapoo eligilone yayo woosaso, “Bei kasimaga tei eligili odoo diayo Keliso Debidiyo amawe dee ka takeliyo? <sup>36</sup> Debidiye to kitulugu sabolo Dio Tei maga takaso,

‘Godeeye mo Lodee (wiligi odoo toba) mapoo takaso:

“No abolo wiligi doloso badalame mo dee deede dokolo bie.

Osoloso nee ha teli odoo nama hemi deebée dalaiso.’”

<sup>37</sup> Debidiye Keliso mapoo ‘Mo Lodee’ diso. Esino bei kasimaga tei eligili odoo diayo ‘Keliso Debidiyo amawe dee ka takeliyo? Kelisoye Lodee

osoloso Debidiyo amawe dalai tebiayo? O, Keliso yo Lodee osoloso yo Debidiyo amawe oso.”

Odoosusuga goomogolone o to mapoo medeeduso.

*Yesuye tei eligili odoo dia goo taka  
(Matiyu 23:1-36, Luka 20:45-47)*

<sup>38</sup> Yesuye odoo susuga mapoo eligilone egeesee takaso, “Niba tei eligili odoo mapoo medee ege. Diba dugo dia tekepo mekikaloso silesibiliso, osoloso bi neiso teli mi mapoo debeli odoo oso diba ogoloso homo beiyopoo gasuwuloso goomoga to takalame goomogeliso. <sup>39</sup> Diba howo gisili moso ma kulodu wiligi odoo toba eyo debi mapoo bulumulame, osoloso wo toowa nologolone debei mi mapoo wiligi odoo toowa toba eyo debi mapoo bulumulame goomogeliso. <sup>40</sup> Esino diayo sobo bauwe ebilame kukunoloso dia moso sabolo bi sabolo dibada doloso toloso omapoo dopolone, dia goo gagaloso howo dia sage gisiliso, odoo aboso diba tekepo odoo dee gooleedalame. Esino bei egeesee maga diba dala toowa talaiso.

*Sobo bauso emegeidi bi teneli  
(Luka 21:1-4)*

<sup>41</sup> Yesu tei moso tegei kulodu edebeeyo molee ko bokosi mapoo sooloogamelee koola mapoo badolone odoo susuga bameleeso. Bi bei odoo molee ko toowa masi sooso. <sup>42</sup> Osoloso sobo bau bi mauwe oso sibilesi molee ko ta bakadio toosooso.

<sup>43</sup> Esemee Yesu o hamamee dili odoo gilimadoloso dimapoo egeesee takaso, “Ayo nimapoo goo hee toowa taka, odoo susuga molee ko sooso,

esino sobo bau bi mauwe hagoso molee ko bakadio toosoo oso dagadiso. <sup>44</sup> Bei odoo diba bi bei, esino dia bi abo pepoko ka toosoo. Esino sobo bau yo bi mauwe yayo sibilesi, o wo talame magoo melee molee ko pepoko olo susuga toosooso.

## 13

*Yesuye Godeeyo tei moso tegei oso tokenee palai goo taka*

*(Matiyu 24:1-2, Luka 21:5-6)*

<sup>1</sup> Beeame omapoo Yesu tei moso tegei pogoloso dimeleeno, o hamamee dili odoo heeso sibilesi yimapoo egeese takaso, “Eligili odoo, ibada tei moso yoso tegei medee tekepo hagee, no ege, osoloso yo toowa medee tekepo, no ege,” diso.

<sup>2</sup> Esem Yesuye to nei yimapoo egeese takaso, “Tei moso tekepo tegei epedee no hagee ogo, hamamee guobigileiso, eseega yo hede peso yo hee ma topudoo malaime,” diso.

<sup>3</sup> Osoloso Yesu Olipi mubi dokodoo tei moso tegei ma hodiokoo bolone badoboome, Pita, Yemes, Yonee, osoloso Endulu diayo dibusomo sibilesi yimapoo woosaso, <sup>4</sup> “Nayo imapoo takee, goo susuga hagoso kopolone ka peledobalaiyo? Osoloso goo susuga hagoso sibilei koola topooga iyo goo mudu opusomodi kasi ogoloso ka gooleedalaiyo?” diso.

<sup>5</sup> Esem Yesuye dimapoo to nei egeese takaso, “Niba obeeamo, odoo heeso nimapoo gamenee takeeyaga. <sup>6</sup> Odoo bei oso sibilesi ‘A Kelisoso’, dee takalaiso. Diayo egeese takooga, odoo susuga peegoo gilimado dileiso. <sup>7</sup> Osoloso nee

mosobia koola mapoo ha to osoloso, mosobia eli sage mapoo ha to dee taka duga, niba haga na ebige. Goo susuga peledabalaiso, esino hoo poogoo ogosonee. <sup>8</sup> Osoloso mosobia heeso mosobia hee mapoo nei ha to nei ha to dalaiso, osoloso mipoo toowa hamapoo mosobia opusomo opusomodi mapoo mibia toowa sibileiso. Osoloso nei me pagalaiso. Esino goo susuga hagoso peledobooga, soboso holo soomagalame si dadala masi si dadalaiso, bei dala beeamo mimooloogoo oso.

<sup>9</sup> Esiga goo susuga hagoso peledobooga, niba obeeamo. Edebeeyo niba goo palabalai mapoo iyado dileso, howo gisili moso tegei ma kulodu niba wologolaiso. Osoloso amapoo tei too maga niba wiligi toowa tebisa odoos dibada mudu giyopoo gilimado peleso mo goo dimapoo takalaiso. <sup>10</sup> Mi hoo pagalai hoogoo mologa, mo tekepo hagee daga edebeeyo mi susuga mapoo takomo dileso, odoos susuga duloso tebia mapoo. <sup>11</sup> Osoloso edebeeyo niba goo palabalai mi mapoo ido duga, niyo takalai goo haga na koude. Bei niyo takalai googooloo tekepo nimapoo Godeeye tenelaiso. Esino niba nibusomo to takalaime, Dio Tei oso nibulo toboloso to ka takalai.

<sup>12</sup> Omeiye omolo teli mapoo ido dilame tiasalaiso. Osoloso omaye owolo sabolo teli mapoo ido dilame tiasalaiso. Osoloso holaisoso mesilega pogoloso, oma dio owee dio teli mapoo gilimado dileiso. <sup>13</sup> Bei niyo amapoo tei too maga odoos susugaso niba hegileiso. Esino odoos agayo o tei too kalawoloso dalaso dileso hoo poogoo mapoo ka peledobooga, yo gie badeli talaiso.

<sup>14</sup> (Hesigeli odoos, no goo hageeyo bei medee

gooleede.) Tei moso mapoo Godee hegili bi tokenee mudu opusomodi bi oso melega pagalai mi mapoo molo ogoga, Yudiya mi omapoo debeli odoo mubi dokodoo saga kukulo pele. (Bi tokenee hagoso Godeeyo howo woola tei moso tokenee palaiso, esiga Yu odoo oso tei moso kulodu gasibilesa Godeeyo hu dokodoo poudalame sibilame goomogalaime.) <sup>15</sup> Osoloso odoo moso hau mapoo badoga, bi talame moso kulodu na gadi. <sup>16</sup> Osoloso odoo homolee mapoo nei howo sogomo siloga, o mosopoo gidei na tadi. <sup>17</sup> Esiga sooloo dolo, sobo koowasi moodooga sabolo osoloso sobo holowee too neli sabolo beame omapoo kukulei beame tekepo agalaime. <sup>18</sup> Esiga Godee mapoo toodagee. Bei goo hagoso wau beame mapoo sibilega pagalame. <sup>19</sup> Bei beame omapoo dala goo toowa sibileiso. Esiga mi toowa bei mimooloogoo omaga simi, dala toowa hageesi edebeeyo egele. Esiga dala hagoso dilesa hoo poogooga, hamamee dala goo hageesi see agalaime. <sup>20</sup> Esiga Godeeye dala beame deiyepo moodoolaiso. Esino yayo beame sage magoo diepi, odoo susuga gie badele pegeli. Esino dala ma kulodu Godeeye hesiga odoo abo gooleepugulone dala beame see deiyepo moodoolaiso. <sup>21</sup> Beeame omapoo edebeeyo nimapoo sibilesa, 'Ege! Keliso hagoso,' o 'Yo koo badoso,' dee takooga, niyo dimapoo tei na te. <sup>22</sup> Bei gamenee Keliso sabolo osoloso gamenee Godeeyo to tosili odoo oso sibilesa Godeeye hesiga odoo wulo gilimilame goo toowa mudu opusomo opusomodi moodoolaiso." <sup>23</sup> Esiga Yesuye

dimapoo egeesee takaso, “Niba obeeamo! Goo hagee sibilei molome, ayo goo susuga nimapoo takaso.”

*Yesuye see sibilei goo  
(Matiyu 24:29-44, Luka 21:25-33)*

<sup>24</sup> “Beeame omapoo dala goo toowa me pogoloso, hamamee, ‘osoko neligidi pigileiso, osoloso a sabolo gadee pigileime. <sup>25</sup> Osoloso giwo keima dokodooga tikedibileiso, osoloso kitulugu bi toowa keima dokodoo egee molo Godeeye halabileiso.’

<sup>26</sup> Beeame omapoo odoosusuga oso Odoos Holo, a kolobo ma kuloduga gadeepugu sabolo kitulugu sabolo siboga agalaiso. <sup>27</sup> Osoloso ayo sibilesos, momamaiyesusuga diyes dalaiso, Godeeye hesiga odoos mi toowa mapoo egee do iyadalame.

<sup>28</sup> Esiga niba sokai (homo) maga goo goolee medee te. O du sisigalosos moulosos sees pisigaga, mi kibilei koola tooboo dees goolee. <sup>29</sup> Egeeseega ayo nimapoo taka goos osos peledaba ogoga, Odoos Holo, a sibilei dias koola tooboo dees goolee. <sup>30</sup> Ayo tei goos nimapoo taka, epedees beeames hamapoo odoos hagees do wedilegas dogas, goos susugas hagosos peledobalaisos. <sup>31</sup> Kei sabolos mi sabolos mauwes pagalaisos. Esinos mos toos kookaiyos molosos osee malaisos.”

<sup>32</sup> Osolosos Yesuyes egeesees takasos, “Odoos susugas goos hagosos sibileis beeames sabolos osokos howos sabolos gooleedeles. Osolosos momamaiyes keimis mas dokodoo egees doos sabolos, Godeeyos owolos abolos gooleedeles. Esinos hedepe mas Godeeyes gooleedoo.

<sup>33</sup> Osoloso beame oso sibilei nibolo gooleedele, esiga niba moodoo doloso bolone ka deebee.

<sup>34</sup> Odoo Holo, ayo sibilei egesi moloso, edebeeyo mi hee mapoo dulone, o tou teli odoo mapoo moso hagee gibamelee, dee takoloso dileiso. Osoloso yo tou teli odoo mapoo moso egee gibadalai maga tou opusomo opusomodi pileiso. Osoloso osulu gibalai odoo mapoo yayo see wedi sibilei maga egeese takalaiso, ‘Medee be!’

<sup>35</sup> Esiga mosowo oma masi aso. Esiga niyo medee be! Bei ayo sibilei beame niba gooleedele. Habe sibumobeele, o gesi domo sibumobeele, o kudi takooga sibumobeele, o gesikolodee sibumobeele. <sup>36</sup> Osoloso ayo saga sibileso ogoga, niba tiesa molo agalai tekeponee. <sup>37</sup> Ayo nimapoo to taka see odoo susuga mapoo takooso, niba moodoo doloso, bolone ka deebee,” diso.

## 14

*Wiligi odoo tebisa oso Yesu wolomalame to mou goo*

*(Matiyu 26:1-5, Luka 22:1-2, Yonee 11:45-53)*

<sup>1</sup> Osoloso Godeeye gababia goolee pugu wo nalai sabolo osoloso wo mosoowe nalai beame bakadio hoogoo meleeso. Esemte tei moso wiligi tebisa odoo sabolo osoloso tei eligili odoo sabolo diayo Yesu tolosa mada wolomalame eli esiamo silesibiso. <sup>2</sup> Esino diayo diso nediliyo egeese takaso, “Iyo wo ne hamapoo yo tolosa wolomalaime, bei odoo susuga oso imapoo kamanaloso ibolo biligiyaga,” diso.



*Betani mi mapoo soboso bo i sisigagili medee tekepo oso Yesuwo wiligi mapoo soo goo  
(Matiyu 26:6-13, Yonee 12:1-8)*

<sup>3</sup> Yesu Betani mi mapoo Saimon daga kolo e bia masi eyo mosopoo badolone nei nameleeso. Esemе sobo heeso bo i sisigagili medee tekepo mai masi pepoko, o hu alabasta, omapoo keedo simiso. Yo sibileso bo i sisigagili medee tekepo keeso, o hu nad, me gooboopuguloso, Yesuwo wiligi mapoo sooso.

<sup>4</sup> Esemе odoо abo omapoo debei oso ogoloso komonolone diso nediliyo egeesee wosogaso, “Bei kasimaga sobo yayo bo i sisigagili medee tekepo goo mauwe mapoo sologo pugulone ka mauwe paga pele?” diso. <sup>5</sup> “Yayo bo i sisigagili medee tekepo ee odoо mapoo neiso talame tenee diepi, molee toowa 300 ee toloso bi mauwe odoо mapoo teneli.” Diayo dee takoloso, sobo yimapoo kamanaso.

<sup>6</sup> Esemе Yesuye dimapoo nei takaso, “Yimapoo egeesee na takee. Bei kasimaga niyo yimapoo kamanaloso ka takala? Yayo amapoo goo tekepo moodooso. <sup>7</sup> Esiga bi me odoо beame susuga nibolo dabalaiso. Esiga niyo diba gooleepuguga, diba biso pidilei tekepo. Esino beame susuga ma kulodu a nibolo badalaime, esiga niyo beame susuga omapoo a pidileime. <sup>8</sup> Esiga sobo hagosо yayo moodolai dee goolee goo ee amapoo moodooso. Yayo mo suso hamamee midoo ma kulodu malai goo ee goolee pugulone, bo i sisigagili medee tekepo oso amapoo sooso. <sup>9</sup> Ayo nimapoo tei goo hee taka, edebeeyo mi toowa mapoo to medee tekepo takomo duga, sobo

hagoso amapoo moodoo goo ee see takalaiso, osoloso diayo yo see goolee pigilame,” diso.

*Yudaseeye Yesu tolosa ha teli mapoo tenelame to tiasoo goo*

*(Matiyu 26:14-16, Luka 22:3-6)*

<sup>10</sup> Osoloso Yesu o hamamee dili 12 ma kulodu odo hee Yudasee Isakeliyot yayo tei moso wiligi tebisa mapoo dileso Yesu dimapoo tiasalame diso. <sup>11</sup> Esem diayo o goo dume, dia goomogolone yimapoo molee nei tenelame to takoloso tei magooso. Esem Yudaseeye Yesu tolosa dimapoo tenelame eli esiamo silone beame tekepo bameleeso.

*Yesuye o hamamee dili odo sabolo Godeeye gababia wo ne goo*

*(Matiyu 26:17-25, Luka 22:7-14,21-23, Yonee 13:21-30)*

<sup>12</sup> Osoloso wo mosoowe nalai beame oso mimooloogooga, daga hoogoo Godeeye gababia omapoo Yu odoo dibada amawe piligilega poogoo ee goolee pigilame, diayo Godeeye gababia wo nali beame omapoo, diayo sipi be hu molubo gie kakauwa wologaliso. Esem Yesuwo hamamee dili odo oso Yesu mapoo egeesee woosaso, “Nayo iba kamapoo dileso Godeeye gababia wo nalai moodolai ka goomogolo?”

<sup>13</sup> Esem Yesu o hamamee dili odo bakadio diye dolone egeesee takaso, “Niba Yoluselem mi toowa mapoo diadee. Osoloso niba omapoo dileso ogoga odoo howo keedoloso eli domopoo dumologa tugodalaiso, osoloso niyo yimapoo hamamee deede. <sup>14</sup> Osoloso yo moso kulodu

gaduga, moso eyo oma mapoo egeesee takee, 'Eligili odoo oso egeesee taka, "Ayo mo hamamee dili odoo gilimadoloso, Godeeye gababia wo nalame debi poopa gooboogoo kasomo?"' dee takee. <sup>15</sup> Osoloso yayo niba moso dokodoo ido peleso debi poopa gooboogoo toowa olo moodoo doloso melee eligileiso. Esiga ibada wo niyo omapoo moodee," diso.

<sup>16</sup> Esemé Yesu o hamamee dili odoo bakadio oso Yoluselem mi toowa mapoo diadeeso. Diba omapoo dileso egeino, goo Yesuye dimapoo taka goo susuga ee molome egeiso. Esemé diayo Godeeye gababia wo nalai omapoo moodooloso, diba see Yesuye o hamamee dili odoo abo sabolo debei mapoo wedi diso.

<sup>17</sup> Osoloso habedee mapoo Yesu o hamamee dili 12 sabolo sibilesos moso omapoo peledabaso. <sup>18</sup> Diba omapoo wo nolone dopome, Yesuye dimapoo egeesee takaso, "Ayo nimapoo tei taka, mooloogoodoo hagee ma kulodu odoo hee abolo wo hagee namolo oso a tiasalaiso."

<sup>19</sup> Esemé Yesu o hamamee dili odoo oso to hagee dume, dia goohelime, diayo Yesu mapoo egeesee woosaso, "Ayonee, o ayowo?" diso.

<sup>20</sup> Esemé yayo dimapoo nei takaso, "12 odoo mooloogoodoo hagee ma kulodu, odoo agayo abolo wo podoloso homokoko si eyo i daga keedoloso bedi mapoo olugu doloso naga, odoo oso a tiasalaiso. <sup>21</sup> Esiga Godeeyo toso daga hoogoo booka mapoo taka Odoo Holo, a talaiso, diso. Esiga to ee dodolone a talaiso. Esino Odoo Holo, a wolomalame tiasili odoo yo dala toowa

talaiso. Esiga oweeye yo soomagelega poogoo diepi, yo tekepo peliyo,” diso.

*Lodee goolee pugu wo ne goo  
(Matiyu 26:26-30, Luka 22:19-20)*

<sup>22</sup> Osoloso diba wo nalaga molome, Yesuye wo toloso, Godee mapoo goomoga toodagoloso wo popeiso. Osoloso o hamamee dili odoo mapoo pulone egeesee takaso, “Ne, hagee mo suso,” diso.

<sup>23</sup> Osoloso yo see geleipi ko i kapu mapoo keesoo toloso, Godee mapoo goomoga toodagoloso, dimapoo teneme, diayo susuga homokoko i neso.

<sup>24</sup> Osoloso Yesuye see egeesee takaso, “Hagee mo sawo. Godeeye olo takaso, ‘A odoo bei sabolo hedepe dalaiso,’ diso. Esiga goo hagoso peledabalame mo sawo peegoo sologo pigileiso. <sup>25</sup> Esiga ayo nimapoo tei goo hee taka, a epedee hamapoo geleipi ko i keesoo see nalaimo. Esino hamamee Godeeye wiligi doloso badalai mi mapoo geleipi ko i keesoo dia nalaiso.”

<sup>26</sup> Osoloso diba goomoga kosaiya pouloso, see Olipi mubi dokodoo paladeeso.

*Pitaye Yesu boobado pigilei maga Yesuye taka  
goo  
(Matiyu 26:31-35, Luka 22:31-34, Yonee 13:36-38)*

<sup>27</sup> Esemme Yesuye see dimapoo egeesee takaso, “Niyo susuga a pogoloso kukulo dileiso. Bei Godeeyo toso booka maga egeesee takooso, ‘Godeeye sipi be hu bali odoo ee wolomalaiso, osoloso sipi be hu susuga oso yimaga peegoo kukulo dileiso.’”

<sup>28</sup> Osoloso Yesuye see egeesee takaso, “A ta maga see hogabuloso, malalo dilesa, Gelili mi toowa mapoo niba tugodalaiso.”

<sup>29</sup> Esem Pitaye Yesuye to taka duloso Yesu mapoo egeesee takaso, “Haye! Odo aboso no pogoloso diadeega, ayo no pogoloso dileime.”

<sup>30</sup> Esino Yesuye yimapoo see egeesee takaso, “Ayo namapoo tei taka, gesi hamapoo kolokoloso taka bakadio delega, malalo hoogoo mologa, nayo bakadio hedepe omapoo ‘A yo gooleede’, dee takalaiso.”

<sup>31</sup> Esino Pitaye Yesuwo to su mapoo to kitulugu sabolo nei egeesee takaso, “Ayo egeeseelaim! Edebeeyo no wolomaga, a nobolo talaiso.” Esem Yesuwo hamamee dili odo susuga to hedepe egeesee takaso.

*Yesuye Getesemeni homolee mapoo Godee mapoo toodagemelee goo*

*(Matiyu 26:36-46, Luka 22:39-46)*

<sup>32</sup> Osoloso Yesu o hamamee dili odo sabolo Getesemeni olipi homo segei homolee omapoo sibadeeso. Osoloso Yesuye o hamamee dili odo dimapoo egeesee takaso, “A dilesa Godee mapoo toodagalaiya, niba hamapoo deeb,” diso. <sup>33</sup> Osoloso yayo dulone Pita, Yemes osoloso Yonee gilimadoloso diso. Yesu yo omapoo dilesa badoboome, goohele goo sabolo su ma kulodu hegi goo oso yimapoo simiso. <sup>34</sup> Esem Yesuye dimapoo egeesee takaso, “Mo su ma kulodu goohele goo oso sibilone, a teyaga. Esiga niba hamapoo dopolone toodagolone deeb,” diso.

<sup>35</sup> Osoloso yo dimaga pepoko hoogoo dileso, ebiso miyomoo tugusaloso balaboo tialoso molone Godee mapoo toodagaso, yimapoo dala toowa egee sibo Godeeye yimaga peegoo tokopigilame. <sup>36</sup> Yayo toodagolone egeesee takaso, “Ma, mo ma! Goo susuga namapoo kalawanee. Esiga dala toowa oso amapoo hagee sibo, nayo peegoo magalai soowayo? Esino nayo goomoga goo moodee, ayo goomoga goonee,” diso.

<sup>37</sup> Osoloso Yesu dokodoo toodagoloso wedi dileso egeino, o hamamee dili odoo bakadio hedepedi tiesa molome egeiso. Esemе yayo Pita tidipuguloso yimapoo egeesee takaso, “Saimon, no tiayo? No beame deiyepo hamapoo abolo bolone badalai tebiledo? <sup>38</sup> Esiga niba bolone Godee mapoo toodagolone deebee, niba kukuli goo mapoo homodobiaga. Bei nibada googoollee oso goo tekepo talame goomogoso, esino nibada su oso goo tokenee talame goomogoso,” diso.

<sup>39</sup> Osoloso yo see wedi dileso, Godee mapoo toodagolone goo hedepe onosee toodagaso. <sup>40</sup> Osoloso yo see dimapoo wedi sibilesa egeino, diba tiesa molome egeiso, bei diba tila paga oso howo seme. Osoloso diayo Yesu mapoo to nei takalai gooleedele poogooso.

<sup>41</sup> Yesu yo see bakadio hedepedi mapoo toodagoloso, o hamamee dili odoo mapoo wedi sibilesa, diba tidipuguloso egeesee takaso, “Niba hosolone wulo tiesa malala? Tia olo oso! Odoo Holo, a tokenee odoo mapoo toloso tenelai beame olo epedee hamapoo sibo. <sup>42</sup> Ege, a

tiasili odoos sibo. Teebee, iba diba tugodalame dimo!” diso.

*Edebeeyo Yesu too goo*

*(Matiyu 26:47-56, Luka 22:47-53, Yonee 18:3-12)*

<sup>43</sup> Yesu yo to takomolome, o hamamee dili odoos hedepe, Yudasee, omapoo peledabaso. Odoos bei Yudaseebolo sibulone Yesu talame wei sabolo kaiya sabolo tolosos tosi badeeso. Odoos si badee hagee, tei moso wiligi odoos te bisa sabolo, tei eligili odoos te bisa sabolo, Yu wiligi odoos te bisa oso, diba diye diso.

<sup>44</sup> Yudasee yo sibilame badolone, Yesu talai odoos mapoo egeesee takaso, “Ayo dileso odoos tolosos adaga, odoos oso. Esiga niyo dileso yo tolosos medee bolone ido di,” diso. <sup>45</sup> Osolosos Yudasee yo odoos mooloogoodos pogolosos dileso, Yesuye te bidi mapoo hoogos dileso, yayo egeesee takaso, “Eligili odoos!” dee takolosos, Yesu adaso. <sup>46</sup> Esemee odoos abo oso sibilesos Yesu toosos. <sup>47</sup> Esinos Yesu o hamamee dili odoos hee koola omapoo te bidi oso o kaiya tadolosos, tei moso wiligi toba eyo tou teli odoos kaiyaso woomelesos eyo doopos poogoome, dulu asoosos.

<sup>48</sup> Esemee odoos Yesu talame si badee dimapoo Yesuye egeesee woosaso, “Niyo goolee a heli teli odoos oso badoboome a talame kaiya sabolo wei sabolo tolosos ka si badeeyos? <sup>49</sup> Osolosos ayo beeamee susuga tei moso tegei ma kulodu eligimili niyo egeisos. Esino bei kasimaga niyo a omapoo telega ka poogoowo? Esino Godeeyos to booka oso taka ee dodolone, niyo epedee sibilesos a ka toso,”

diso. <sup>50</sup> Esemé Yesu o hamamee dili odoó susuga oso yo pogoloso kukulo diadeeso.

<sup>51</sup> Osoloso odoó gie kauwa dugo booloso, Yesu diayo toloso dime hamamee deedeé diso. Esemé diayo yo ogoloso, yibolo talame o dugo mapoo temeleso, o dugo puo puguso. <sup>52</sup> Esino o dugo dimapoo yane pogoloso, yo bododiwe piase.

*Yesu wiligi odoó tebisa mapoo goo palabalame ido di goo*

*(Matiyu 26:57-68, Luka 22:54-55,63-71, Yonee 18:13-14,19-24)*

<sup>53</sup> Osoloso diayo Yesu idoloso tei moso tegei wiligi toba eyo mosopoo, tei moso wiligi odoó tebisa sabolo, Yu odoó wiligi tebisa sabolo, tei eligili wiligi tebisa sabolo oso mooloogoodoloso debei omapoo ido diso. <sup>54</sup> Esemé Pitaye hamameedeé Yesu deedeé dileso, tei moso wiligi eyo moso belee ma kulodu badebeiso. Yo omapoo badolone tei moso gibali odoó sabolo kekeiseme dou hameleeso.

<sup>55-56</sup> Esemé tei moso wiligi tebisa sabolo osoloso Yu wiligi tebisa sabolo oso Yesu wolomalame goo tokenee esiaso. Osoloso odoó susuga oso Yesuwo hu maga gamenee takolone goo mudu opusomo opusomodi takaso. Esino diayo to mudu opusomo opusomodi taka ma kulodu, tei goo egele.

<sup>57</sup> Esino odoó aboso tebisaloso, Yesuwo hu maga gamenee egeeseé takaso, <sup>58</sup> “Tba odoó hagosó egeeseé takeme duso, ‘Edebeeyo tei moso tegei hagee ayo guopuguloso, see beeame bakadio hedepedi ma kulodu tei moso dia takalaiso. Esino edebeeyo takalaime,’ yayo dee takeme



duso,” diso. <sup>59</sup> Esino diayo to mudu opusomo opusomodi taka ma kulodu tei goo egele.

<sup>60</sup> Esemte tei moso wiligi odoo toba oso odoo susuga mooloogoodoo ma kuloduga taba molone Yesu mapoo egeesee woosaso, “Edebeeyo nee hu maga goo mudu opusomo opusomodi egee takoo maga nayo to nei dimapoo takalaisomo?” <sup>61</sup> Esino Yesuye to nei takele poogooso.

Esemte tei moso wiligi odoo toba oso to see Yesu mapoo egeesee woosaso, “No Godeeyo owolo, Keliso somo?” diso.

<sup>62</sup> Esemte Yesuye to nei egeesee takaso, “O, aso. Esiga hamamee Odoo Holo, a ma Godee kitulugu eyo dee deede dokolo buloso yibolo wiligi doloso badoga niyo agalaiso, osoloso keimi ma dokodooga, kolobo ma kuloduga see wedi siboga niyo agalaiso,” diso.

<sup>63</sup> Esemte tei moso wiligi odoo toba oso to hagee dume, dia komolone o dugo tologo puguloso egeesee takaso, “Bei kasimaga iyo yimapoo goo abo ka esileiyo? <sup>64</sup> Bei yayo ‘a Godeeyo owolo oso’ dee taka maga, yayo Godee mapoo mesilega osoloso ebilega to tokenee taka, niyo olo duso. Esiga niyo goolee yimapoo ogoo goo moodoolaiyo?” diso.

Esemte Yu wiligi tebisa susuga oso egeesee takaso, “Yesu dia tokenee odoo, esiga yo wolo-malai tekepo,” diso. <sup>65</sup> Esemte odoo aboso Yesu mapoo makawo pagaso. Osoloso diayo Yesuwo howo mapoo dugoso tialogooso, dibada dee tiadoo oso mudu mapoo woolone egeesee takaso, “Nayo takeliso no Godeeso, osoloso goo susuga gooleedooso, diso. Esiga no odoo agayo woolo?”

Imapoo takee,” diso. Osoloso tei moso gibali odoososo yo ido dulone woomodiso.

*Pitaye Yesu yo gooledele, dee taka*

*(Matiyu 26:69-75, Luka 22:56-62, Yonee 18:15-18,25-27)*

<sup>66-67</sup> Osoloso Pita yo tei moso wiligi toba eyo moso belee ma kulodu kekeiseme dou holone badebeiso. Esemetei moso wiligi toba eyo tou teli sobo hedepe oso yayo badebei omapoo sibilesoyimapoo medee bameleso, egeesee takaso,

“No Naselet odoososo, Yesubolo silime egei odoososo hee noso,” diso.

<sup>68</sup> Esemetei Pitaye sobo yimapoo gamenee egeesee takaso, “Nayo odoososo egee takoo eyo goo, a gooledele,” diso. Osoloso Pita yayo egeesee takoloso, moso belee osulu gasibili pee mapoo diso. Esemekolokolo takaso.

<sup>69</sup> Osoloso tei moso wiligi toba eyo tou teli sobo yayo Pita see omapoo tebidi egeme, yayo odoososo abo yibolo tebidi omapoo egeesee takaso, “Odoososo hagee tei Yesubolo sili hee yososo,” diso. <sup>70</sup> Esemetei Pitaye see takaso, “Haye! Asonee,” diso.

Esemediba pepoko dobosososo hamamee, odoososo abo koola hamapoo tebidi oso Pita mapoo see egeesee takaso, “Bei no Gelili odoososo osoloso Yesu sabolo Gelili odoososo, esigasoso no Yesubolo sili odoososo hee noso,” diso.

<sup>71</sup> Esemetei Pitaye to kitulugusabolo egeesee takaso, “Ayo tei goososo takelega poogooga, Godeeye amapoo dala toowa tenelai goomogo! Niyo odoososo egee takoo a gooledele!” diso.

<sup>72</sup> Osoloso Pita yo egeesee takoloso epedee omapoo, kolokolososo taka bakadio diso. Esemetei

Pita Yesuye yimapoo to taka hagee goolee puguso, “No kolokoloso taka bakadio delega, malalo hoo-goo mologa, nayo bakadio hedepedi omapoo ‘A yo gooleedele’ dee takalaiso.” Esem Pitaye to hagee goolee pugume, goohele toowa sibume, dia pisaso.

## 15

*Yesu Paillet mapoo ido di goo*

*(Matiyu 27:1-2,11-14, Luka 23:1-5, Yonee 18:28-38)*

<sup>1</sup> Osoloso gesikolodee mapoo tei moso wiligi odo tebisa sabolo, osoloso tei eligili odo sabolo, osoloso Yu wiligi tebisa sabolo, osoloso wiligi odo tebisa abo susuga oso goo hee moodolai to mouso. Osoloso diayo to mouloso, Yesuwo dee mapoo tiso tialogoloso, Loum gamalee mi toowa wiligi odo toba, Paillet mapoo ido dilesos teneeso.

<sup>2</sup> Esem Paillet yayo Yesu mapoo egeesee woosaso, “Yu odoowo wiligi toba nosomo?”

Esem Yesuye nei egeesee takaso, “O, no egee takooso,” diso.

<sup>3</sup> Esem tei moso wiligi odo tebisa oso Yesu tokenee goo bei tooso doloso, dia gigidiso. <sup>4</sup> Esem Pailleteeye see Yesu mapoo egeesee woosaso, “No odo susuga oso nee goo maga mudu opusomo opusomodi egee takoo omapoo nayo to nei takalaimoyo?” diso.

<sup>5</sup> Esino Yesuye to nei takele. Esem Paillet yayo goo hagee ogoloso hoowaso.

*Pailteeye Yesu wolomalame woosa goo*  
*(Matiyu 27:15-26, Luka 23:13-25, Yonee 18:39—*  
*19:16)*

<sup>6</sup> Osoloso dugo susuga ma kulodu, Godeeye gababia wo ne beame omapoo, odoosusuga goomogalame, Pailteeye odoosusuga hee neliga moso ma kulodu badeli, odoosusuga yoo tolososusuga di, dee takeliso. Esino yoo daga odoosusuga oso goomoga odoosusuga hu hesiaga, odoosusuga ee tolososusuga neliga moso tegei maga peggoo di, dee takeliso. <sup>7</sup> Beame omapoo odoosusuga hu Balabas yayo daga o odoosusuga sabolo Loum gamalee odoosusuga sabolo biligameleso, diayo odoosusuga hee wolomaso. Esiga yoo neliga moso tegei ma kulodu badebeiso. <sup>8</sup> Osoloso odoosusuga mooloogoodoo oso sibilesosusuga, Paillet mapoo egeesee takaso, “Nayo neliga moso ma kulodu badeli odoosusuga hee peggoo di, dee takeliso. Esiga nayo dugo hamapoo odoosusuga hee neliga moso maga peggoo di, dee takee,” diso.

<sup>9-10</sup> Esino tei mososusuga wiligisusuga odoosusuga tebisa oso Yesu mapoo koolone yoo tolososusuga Paillet mapoo sibilesosusuga te-nee yayo ogolososusuga, gooleedoosusuga. Esemesusuga Paillet yayo odoosusuga susuga mapoo woosaso, “Ayo Yu odoosusuga wiligisusuga toba ee peggoo di, dee takalaiyo?” diso. <sup>11</sup> Esino tei mososusuga wiligisusuga odoosusuga tebisa diayo odoosusuga susuga mapoo to pupulone, Paillet mapoo egeesee takee diso, “Iba Yesu gowoo, esino Balabas neliga mososusuga maga peggoo di, dee takee,” diso.

<sup>12</sup> Esemesusuga Paillet yayo dimapoo woosaso, “Ayo Balabas neliga maga peggoo di, dee takooga, niyo odoosusuga hee hagee, Yu odoosusuga wiligisusuga toba, dee takeliso. Esiga ayo yimapoo ogoo goo moodoolaiyo?” diso.

<sup>13</sup> Esemе diayo agadilone Paillet mapoo takaso, “Yo homo bulubo magoo mapoo yoguso enige!” diso.

<sup>14</sup> Esemе Paileteeye woosaso, “Bei kasimagayo? Yayo ogoo tokenee toowo?” diso.

Esino odoo susuga oso dia agadilone egeesee takaso, “Yo homo bulubo magoo mapoo yoguso enige!” diso.

<sup>15</sup> Esemе odoo susuga goomogalame, Paillet yayo Balabas yo neliga moso maga peegoo di, diso. Esemе Loum ha teli odoo oso Yesu tiso woloso homo bulubo magoo mapoo yoguso enig-ilame dimapoo teneeso.

*Ha teli odoo oso Yesu mane goo  
(Matiyu 27:27-31, Yonee 19:2-3)*

<sup>16</sup> Osoloso ha teli odoo diayo Yesu toloso Paileteeyo moso toowa medee tekepo ma kulodu ido diso. Osoloso omapoo ha teli odoo susuga gili-madoloso mooloogoodooso. <sup>17</sup> Osoloso diayo Yesu manolone gamenee yo wiligi odoo toba masi palame, yimapoo dugo sage bige masi mediloso, we ti sidoloso o wiligi mapoo mediso. <sup>18</sup> Osoloso diayo Yesu mapoo manolone egeesee takaso, “Yu odoowo wiligi toba mapoo gawuloso goomoge,” diso. <sup>19</sup> Osoloso Yesuwo wiligi mapoo diayo weiso see woo see woo dolone, yimapoo makawo paga demeleso. Osoloso diayo Yesu mapoo manolone o mudu giyopoo dibada ebiso miyomoo tugusoloso wiligi gawuloso gamenee yimapoo tei to demeleso. <sup>20</sup> Osoloso diayo Yesu mapoo mane koodobuloso, diayo Yesu mapoo dugo bige masi medi peegoo tamagoloso, see o dugo kadiso.

Osoloso diayo Yesu homo bulubo magoo mapoo dokodoo yoguso enigilame peegoo ido diso.

*Yesu homo bulubo magoo mapoo yoguso eniga goo*

*(Matiyu 27:32-44, Luka 23:26-43, Yonee 19:17-27)*

<sup>21</sup> Osoloso ha teli odoososo Yesu idolososo diadaga meleeno, diayo Saimon eli domopoo Yoluselem mapoo sibumolome tugodooso. Esememe diayo yo idolososo Yesuwo homo bulubo magoo imado di, diso, bei Yesu kitulugu mauwe neme. (Saimon hagee Alesanda dio Lupus dio dibada oma. Yo Sailini mi mapoo badeli odoososo.) <sup>22</sup> Osoloso diayo Yesu tolososo Gologota mi mapoo ido simiso. (Mi hu eyo bei wiligi ki mubi.) <sup>23</sup> Osoloso mi omapoo ido dileso, odoososo hee oso Yesu mapoo sibilesoso geleipi ko i sabolo dala mauwe pegeli meleseneesoso sabolo wulugulososo dala mauwe pagalame Yesu mapoo tenelame siso. Esino Yesuye howo egeesoso nele poogoososo.

<sup>24-25</sup> Esememe gesikolososo osokososo howo bakadio hedeepedi pogolososo osokososo pounomesoso, diayo Yesu homo bulubo magoo ma dokodoo yoguso enigalosososo tulugulososo. Osolosososo diayo Yesuwo dugososo diso dimapoo topulososo pulososo ma ee kasolososo tomobelesoso dolososo dasigelisoso pepokososo dasigisososo. <sup>26</sup> Osolosososo odoososo heesososo Yesu wolomasoso goososo eyo bei odoososo susugasoso osososo agalame Yesuwo wiligisoso ma dokodoo homososo boodososo pepokososo mapoo egeesesososo hogugulosososo opoogoososo, YU ODOOWO WILIGI TOBA. <sup>27</sup> Osolosososo heli teli odoososo bakadio sabolososo homososo bulubo magoo ma dokodoo yoguso enigasososo. Odoososo hee Yesuwo deesoso deedesoso dokolososo homososo bulubo magoo mapoo

yoguso enigaloso tulugu, odo hee dee dopusu dokolo homo bulubo magoo mapoo yoguso enigaloso tulugu diso. <sup>28</sup> Esiga Godeeyo to booka mapoo egeesee takooso,

“Yo heli teli odo masi talaiso.” Esiga Yesuye heli teli odo masi talame homo bulubo magoo mapoo dokodoo molone, to hagee tei diso.\*  
<sup>29</sup> Osoloso odo abo eli maga dulone, Yesu ogoloso manolone dibada wiligi wapisilone yimapoo egeesee takaso, “Nayo egeesee takaso, ‘Ayo tei moso guo puguloso, see beame bakadio hede-pedi ma kulodu dia takalaiso.’ diso. <sup>30</sup> Esiga no telega pagalame homo bulubo magoo ma dokodooga miyomoo mei!” diso.

<sup>31</sup> Osoloso tei moso wiligi odo tebisa sabolo tei eligili odo sabolo diayo Yesubolo hemeeseelone diso dimapoo egeesee takaso, “Yayo odo abo telega pagalame pidimo siliso, esino epedee hamapoo yo telega pagalame eyo nediliyo pidilei tebiledoo! <sup>32</sup> Keliso, Isalael odoowo wiligi toba, yo homo bulubo magoo ma dokodooga miyomoo mouga, iyo ogoloso yimapoo tei ka talai,” diso. Esem heli teli odo bakadio oso, homo bulubo magoo ma dokodoo diayo yoguso enigaloso molone, Yesu mapoo maneso.

*Yesuye ta goo*

*(Matiyu 27:45-56, Luka 23:44-49, Yonee 19:28-30)*

<sup>33</sup> Osoloso osoko olo oo domopoo topoome, neliga oso mi toowa toloso melee, osoko howo

---

\* **15:28:** 15:28 To hagee odo abo oso taka Makaye hogugu dee takeliso, esino odo bei oso taka Makaye hogugule dee takeliso.

bakadio hedepedi poogooso. <sup>34</sup> Osoloso neliga olo mauwe pogoloso hamamee epedee omapoo, Yesuye o to oso neligidi idagolone egeesee takaso, “Eloi, Eloi, lama sabakatani?” To eyo bei egeesee moloso, “Mo Godee, mo Godee, bei kasimaga nayo a ka poogoowo?” diso.

<sup>35</sup> Esemе odoо koola omapoo tebisamelee oso Yesuye to taka hagee dume, diayo egeesee takaso, “Dui! Yo Ilaisa ee i,” diso.

<sup>36</sup> Esemе odoо heeso hoguo dileso, homo sage tolosu su mapoo dugo seme masi tialogoloso, geleipi ko i mei nali keesoo mapoo olugu doloso, Yesuye nalame o maga mapoo heligiso. Osoloso yayo egeesee takaso, “Yo epedee peegee. Ilaisaye sibilesu yo tolosu miyomoo sibabelesu bamo,” diso.

<sup>37</sup> Esemе epedee omapoo Yesuye neligi ilosu taso.

<sup>38</sup> Esemе Yesuye ta beeamе omapoo, tei moso tegei ma kulodu dugo kodia oso kisimelee, Godeeye dokodooga tologo pugumo abaga mouno miyomoo sa puguso. <sup>39</sup> Esemе ha teli wiligi odoо toba yo Yesuwo homo bulubo magooma koola omapoo topudulone, Yesuye tolone goo moodoo ogoloso, yayo egeesee takaso, “Tei takoo, odoо hagee tei Godeeyo owolodoo,” diso.

<sup>40-41</sup> Esemе sobo abo Yesubolo Gelili abaga Yoluselem mapoo sibadee oso, eli sage abaga Yesu homo bulubo magoo ma dokodoo molome balaga meleeso. Sobo mooloogoodoo egee ma kulodu debei, dibada hu Meli Magadalinbolo, osoloso Meli hee (Yemes pepoko dio Yoses dio dibada owee) sabolo, osoloso Salomebolo, diayo



Yesu mapoo bameleeso. Sobo bakadio hedepedi hagoso daga Yesubolo Gelili mapoo silone, Yesu pidimo siliso.

*Yesu midoo ma kulodu toosoo goo*

*(Matiyu 27:57-61, Luka 23:50-56, Yonee 19:38-42)*

<sup>42-43</sup> Yu odoowo tei beame malalo hoogoo molome, diayo tei doloso dabalame bi mopododoo beame habe omapoo, Yosep Alimatiya odoowoo yayo Paileteeye badebei omapoo diso. Yo Yu odoowo wiligi topoloso badolone, Godeeye wiligi doloso badeli oso sibilei omapoo bameli, yayo ebilega Yesuwo su talame Pailet mapoo woosaso. <sup>44</sup> Esemee Yosepye Yesu taso dee takeme, Pailet dia hoowaso. Bei Paileteeye goolee Yesu tele gooleeso, esino Yesu olo saga taso. Esemee yayo o ha teli wiligi odoowoo toba Yesuye ta egei mapoo egeesee woosaso, “Yesu taso dee takemenee teiyo?” diso. <sup>45</sup> Esemee o ha teli wiligi odoowoo toba yayo Yesu tei taso dee takeme, Paileteeye Yosep mapoo egeesee takaso, “Yesuwo su todi,” diso. <sup>46</sup> Esemee Yosepye dugo sage medee tekepo moleeso tolooso, Yesuwo su homo bulubo magoo ma dokodooga miyomoo tomeileeso, dugoso tiadooso. Osoloso yayo Yesuwo su tolooso wulu ou sage yoso moodoo ma kulodu magooso. Osoloso yayo odoowoo abo sabolo yo toowa bidigamo sibileeso, wulu ou miyopoo kisiso. <sup>47</sup> Osoloso Meli Magadalin dio Yosesyo owee Meli dio Yesuwo su magoo mi diayo egeiso.

# 16

*Yesuye toloso hogabia goo*

*(Matiyu 28:1-8, Luka 24:1-12, Yonee 20:1-10)*

<sup>1</sup> Osoloso Yu odoowo tei beame olo daga dileso, hamamee Meli Magadalin, Yemesyo owee Meli, osoloso Salome, diayo melesenee medee tekepo sisigagili Yesuwo su mapoo hedilame moleeso misigaso. <sup>2</sup> Osoloso sadee toowa beame gesikolodee osoko gie pounume, diba Yesuwo midoo agalame diadeeso. <sup>3</sup> Diba eli domopoo diadolone, diso dimapoo egeesee takaso, “Yo toowa wulu ou miyopoo kisi, odoo agayo bidige pigileisomo?” diso.

<sup>4</sup> Esino diba dileso egeino, yo toowa wulu ou miyopoo kisi peegoo bidige puguloso molome egeiso. Yo toowa hagee dia toowa. <sup>5</sup> Esemе sobo diayo wulu ou ma kulodu galaga dileso egeino, odoo gie kauwa dugo sage heliye mouloso dee deedee dokolo badoboome egeiso. Esemе sobo diayo ogoloso, diba dia ebigaso.

<sup>6</sup> Esino yayo dimapoo egeesee takaso, “Niba na ebi. A gooleedooso, niba Yesu Nasalet odoo homo bulubo magoo ma dokodoo yoguso eniga odoo ee esia molo. Esino yo hamapoo mauwe. Yo ta maga hogabiaso. Yo magoo mi mapoo niso ege. <sup>7</sup> Esiga niyo dileso, Yesu o hamamee dili Pita dimapoo takee, ‘Niba Gelili mapoo diadee. Bei Yesu yo daga malalo Gelili mapoo duso. Esiga niba dileso Gelili mapoo Yesu agalaiso. Bei Yesu yayo to hagee daga nimapoo takaso,’ ” diso.

<sup>8</sup> Esemе diayo goo tiadoo sabolo obulone kiki-likilone wulu ou maga hoguo diadeeso. Esino

diayo eli domopaga diadolone, odo hee mapoo to takele poogooso, bei diba obume.

*Yesuye daga odo abo mapoo dileso peledaba  
(Matiyu 28:9-10, Yonee 20:11-18)*

[ <sup>9</sup> Yesuye sadee toowa gesikolodee mapoo ta maga hogabuloso, yo daga Meli Magadalin mapoo dileso peledabaso. Meli hagee Yesuye daga telega silone bo holo 7 o kulodu dobome yayo peegoo hasiso pugu sobo yoso. <sup>10-11</sup> Esem Meli yayo Yesu ta maga hogabuloso sili ogoloso Yesuwo hamamee dili odo diayo goohele sabolo pupusugulone debei mapoo dileso egeesee takaso, “Yesu ta maga hogabuloso silime, ayo egeiso,” diso. Esino diayo to hagee dume, o to mapoo tei tele poogooso.

<sup>12</sup> Osoloso see hamamee Yesubolo sile sibili odo bakadio Yoluselem abaga sibataga molome, Yesu yo mudu opusomo doloso dimapoo peledabaso. <sup>13</sup> Esem diayo Yesu ogoloso, diba see wedi dileso, Yesuwo hamamee dili odo dimapoo diayo Yesu egei takeme, diayo dibada to mapoo tei tele poogooso.

*Yesuye o hamamee dili odo 11 dimapoo dileso  
peledaba  
(Matiyu 28:16-20, Luka 24:36-49, Yonee 20:19-23, Diye Di Odo 1:6-8)*

<sup>14</sup> Osoloso hamamee, Yesuwo hamamee dili odo 11 wo nalaga molome Yesu omapoo dileso peledabaso. Osoloso Yesuye to kitulugu sabolo egeesee takaso, “Niba tei too mauwe odo! Bei kasimaga odo abo oso a ogoloso, sibilesa

nimapoo takeme, dimapoo tei telega ka poo-goowo?” diso.

<sup>15</sup> Esemé Yesúye dimapoo egeesee takaso, “Niba mi toowa mapoo dilesó, to tekepo odoó susuga mapoo takomo di. <sup>16</sup> Esiga odoó agayo to tekepo mapoo tei tolosó howo sawuga, yo badoboso, kookaiyo gie badeli talaiso. Esino odoó agayo to tekepo mapoo tei telega poogooga, yo goo palabalai beeamé omapoo dou koo semili mapoo toodalaiso. <sup>17</sup> Osoloso edebeeyo to tekepo mapoo tei toga, diayo mo kitulugu sabolo goo mudu opusomo opusomodi moodoogamo sile sibileiso. Esiga odoó bo holo oso paladee mo hu maga peegoo hasisileiso. Osoloso diayo to mudu opusomo opusomodi kalagalaiso. <sup>18</sup> Osoloso dibada deeso sa talaiso, osoloso pei i nalagaga, diba wedileime. Osoloso odoó paigiga mapoo dibada deeso sigodaga, susuga weido dalaiso,” diso.

<sup>19</sup> Osoloso Lodee Yesúye dimapoo to taka koodobuloso, Godeeyo kitulugu oso yo keimi mapoo ido peleso, Godeebolo wiligi doloso badalame, Godeeyo dee deedeé dokolo peleso, biaso. <sup>20</sup> Esemé Yesú o hamamee dili odoó oso Yesúwo to ee mesilone, mi toowa mapoo to tekepo takomo diadeeso. Esemé diayo goo mudu opusomo opusomodi moodoogaso, bei Lodeeye dimapoo kitulugu teneme. Bei edebeeyo to tekepo mapoo tei doloso ogoloso gooleedalame.]

**Godeeyo To Tekepo**  
**Portions of the New Testament in the Odoodee**  
**language of Papua New Guinea**  
**Sampela hap Nupela Testamen long tokples Odoodee**  
copyright © 2006, 2015, 2017 Wycliffe Bible Translators, Inc.

Language: Odoodee

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-05

---

PDF generated using Haiola and XeLaTeX on 11 Nov 2022 from source files dated 9 Oct 2020

ffb0eddd-0f6e-5201-89ab-6fcbfcaebeba